



ル 5  
3048  
10





門 儿 6  
號 3001  
卷 10

門 儿 6  
號 2301  
卷 10

門 儿 5  
號 3048  
卷 10

崑新兩縣續修合志卷二十三

列傳

虞臣字元凱祥孫童子時善屬文侍郎葉盛以擇婿屬鄭

文康臣偶過文康門文康一見器賞言於盛婿之成化  
戊戌成進士授兵部車駕主事奉勅安置降夷於廣西  
所過不擾遷職方郎中歷武庫調車駕在兵部垂二十  
年清慎自持遇事執正雖上官貴近弗顧也遷四川參  
議居二年致仕臺臣慰留不得皆出郊餞送且贈路費  
蜀王聞其賢贈以百金扇千握悉謝卻之歸橐蕭然敝  
廬饋粥如韋布時家藏美醞日遣蒼頭伺巷口遇老人  
隱士及儒衣冠者即邀入嘗赴友人宴見有俳優亟趨

昭和九年  
六月十八日  
辨



出曰無溷吾守也平居手不釋卷卒年七十九卒之先  
一日猶爲子弟講書辭旨甚悉臣同年生邑人張翬亦  
以清廉著翬字鳳舉曾祖謫戍雲南遂占籍以進士授  
桐鄉知縣銳志興革特身甚廉母喪歸囊無一錢後補  
陵縣清操如初會縣多勢豪翬欲剷削之卒爲所中免  
歸依先墓以居卒年三十六知縣楊子器葬之小瀟浦  
管琪字儒珍父昌字世隆成化丙戌進士官太僕丞琪器  
宇寬厚律身清謹成化戊戌舉進士授中書舍人歷官  
湖廣左布政使羨餘一無所取會入覲有勸其少通聲  
氣者琪以夤緣爲恥謝之竟以年老致仕琪篤於鄉誼  
同官高敞孝廉葉晨先後卒京邸皆琪視舍殮經紀其

喪與侍郎王倬同年相善嘗使畫工並繪其像相賓主  
坐令後世子孫交相祝其後倬孫世貞嘗拜祖像於管

氏丙舍云按葉奕苞志稿云琪爲中書遷禮部主事進  
員外郎郎中累遷湖廣左布政居官事蹟不  
詳張大復去琪之世僅百數十年亦祇附見於王倬傳  
但稱其清飭不事干謁以老致仕至其父昌與琪生平  
事實絕無可考奕苞作傳時其後裔玉衡惟存左布政  
救命一軸而已傳不傳真有幸有不幸焉仍之以俟考

張汝舟字濟民成化甲午舉人授南昌府同知藩王宸濠  
驕橫仕其地者指爲畏途汝舟至以清嚴著濠始欲致  
之汝舟修温太真祠見志濠好鶴適爲民家犬所傷折  
其足旣笞掠其民又告汝舟言鶴故有牌民乃縱犬斃  
鶴汝舟笑曰鶴卽帶牌如犬不識字何判而釋之濠妃  
之兄爲盜汝舟捕之急妃中夜泣濠爲之請汝舟唯唯



真寘之法濠怒故縱火旁舍給汝舟往救將害之汝舟  
抵門悉其狀呼曰非殿災特邏卒事耳遂不入承檄討  
建昌盜徐九齡方接戰賊持矛刺汝舟民兵熊玉金以  
身代之得免卒殲之在任九年遷思南知府更以簡靜  
爲治清浪鄣督趙某素結權要以貪暴杖殺指揮李某  
其子訴於朝當事憚之屬汝舟汝舟卒致其罪死於獄  
任滿當遷一夕夢其母恠甚且廢明急請致仕歸果如  
所夢家居田僅百畝而待族人鄉黨皆有恩誼或勸爲  
子孫計汝舟曰吾以施貧活族之義遺之足矣年七十  
二卒弟汝粟字養民癸卯舉人知定海縣黃雲誌其墓  
稱其洞燭人情在定海嚴於懲惡以廉公著汝舟季子

擢秀嘉靖辛卯舉人知廣平縣曾孫世瞻字隆卿以童  
子科登嘉靖辛酉鄉薦官慶遠推官引疾歸僦屋故人  
家破囊敝篋不塵一壁已而下居流磬菴右卒

朱棡字良用璫孫旻從子少力學尤精於易講析疑義多  
前人所未發成化辛丑成進士授蕭山知縣縣有湘湖  
久爲豪右所占棡浚之以時蓄洩湖田大稔立丁田法  
諸州縣皆踵行之擢南京御史偕同列劾文選郎貢欽  
納賄罷之又因災異上言天變不虛必與人事相關指  
切時政讀者悚服秩滿便道省母卒於家棡爲人簡易  
沉默言動不苟惜未及大用云孫隆禧嘉靖己丑進士  
官應天府丞加禮部左侍郎



盛洪字思禹頤曾孫成化甲辰進士授刑部主事歷員外郎中三被簡命出按大獄事皆涉貴戚貂璫洪悉論如法不濫不漏時廣東黃散仔等倡亂特詔洪提督海道副使洪廉察情形首嚴舶禁殺賊蕭惟芳等海濱以安上章論通番姦弊及保安事宜悉見嘉納先是通番買港之徒騷擾驛傳至是屏絕市舶中官利通私貨啗以黃金珍玩拒不納禁益嚴遂搆蜚語於逆瑾裁缺歸又二年以海道舊事檄赴廣卒於道時方擢山東按察使已不及矣洪性嚴重雖盛暑未嘗裸跣歷任二十餘年老屋數椽蕭然無改寒素風

王秩字循伯元知州安貞之後成化丁未進士授永康知

縣有富民業映田而飛稅貧人者訟累年不決秩躬行阡陌第其甲乙而賦之夙弊頓清入爲南京兵部主事掌各衛馬快船以法裁中使尙書秦紘重之以馬船料價出江湖二省歲久滋弊請以秩遍歷兩省多所釐正內艱服闋遷刑部員外郎時逆瑾用事入爲京朝官者例有贊秩獨不往瑾使人跡之知其貧亦不問也擢廣東僉事被檄往剿廣西叛蠻懷戢黎人威名特起陞江西副使備兵南贛生擒劇盜張士錦令降者免死量材授職僞黨悉平又議通鹽法民省轉輸而軍興不乏遷按察使桃源盜起副使周憲與戰陷陣死秩督兵進討躬冒矢石立斬害憲者搗其巢且戒軍無屠戮全活甚



多宸濠蓄異志憚秩嘗邀秩幼子可能抱置膝上許以郡主妻之秩謝不敢當歸謂家人曰王志滿氣揚必且爲亂不出十年矣時唐寅客王所秩微諷之始佯狂以免尋擢雲南右布政予告侍養歸卒孫執禮執法

朱文字天昭夏之子自幼篤學兼治易詩春秋補郡諸生試必冠儕與吳縣王鏊齊名成化甲辰成進士觀政吏部連喪父母宏治庚戌授雲南道御史出清軍兩廣先是理戎籍者以搜括隱匿多寡爲殿最文洞燭奸僞稽審持平雖斷歸戎籍莫不心服博羅軍陸某妄指鄉人兄弟二人爲族資其費不得遂誣爲故軍陳羅二姓子皆其從祖養子今二姓絕當還本役文曰養子安用兩

人兩人又何以適爲絕軍之後其人乃服還朝逾年特命侍經筵再按福建務持大體延建二郡歲輸興泉軍儲二萬有奇以其險且遠也至其地糴米民緣爲奸軍恒苦飢文命擇官輸值興泉視歲之豐儉定其值且儲贏以備凶年弊遂絕部民吳孟田治海船商人倪四僱以市外番以通番坐死者十八人文署其牘曰吳造船而不市番倪市番而未嘗造船皆無死律竟出其罪嘗濬閩河湮塞者二十餘里民輸賦者悉免負擔之費城中食貨駢集物價頓減差滿入京再侍經筵出爲湖廣副使疑獄多所平反奉檄造歲楮於衢南直巡按包澤私有所屬不從遂齟齬之聽調歸旋改雲南卽引疾乞



休又四年卒年六十八子七人希周希召希韓希范希富希呂希馮希周自有傳

毛澄字憲清舉宏治六年進士第一授修撰預修會典成進右諭德直講東宮武宗爲太子以澄進講明晰稱之帝帝大喜方秋夜置宴卽徹以賜武宗立進左庶子直經筵以母憂歸正德四年劉瑾摘會典小疵貶諸纂修者秩以澄爲侍讀服闋還朝進侍講學士再進學士掌院事歷禮部侍郎十二年五月拜尙書其年八月朔帝微行澄率侍郎王瓚顧清等疏請還宮旣又出居庸幸宣府又留不返澄等頻疏諫悉不報明年正月駕旋命百官戎服郊迎澄等請用常服不許七月帝自稱威武

大將軍朱壽統六師巡邊幸宣府抵大同歷山西至榆林澄等屢疏馳諫至十二月復偕廷臣上疏曰去歲正月以來鑾輿數駕不遑安居今茲之行又以半歲宗廟社稷享祀之禮並係攝行萬壽正旦朝賀之儀悉從簡畧臘朔省牲罷而不行遂二年矣歲律將周郊禋已卜皇祖之訓曰凡祀天地精誠則感格怠慢則禍生今六飛遐騁旋軫無日萬一冰雪阻違道塗梗塞元正上日不及躬執玉帛於上帝前陛下何以自安且邊地荒寒隆冬尤甚臣等處重城食厚祿仰思聖體勞頓根本空虛遙望清塵憂心如醉伏祈趣駕速還躬親禋享宗社臣民幸甚不報十四年二月駕甫還京卽諭禮部總督



軍務威武大將軍總兵官太師鎮國公朱壽遣往兩畿  
瞻東嶽奉安聖像祈福安民澄等駭愕復偕廷臣上言  
陛下以天地之子承祖宗之業九州四海但知陛下有  
皇帝之號今日總督軍務威武大將軍太師鎮國公者  
臣等莫知所指夫出此旨者陛下也加此號者陛下也  
不知受此號者何人如以皇儲未建欲徧告名山大川  
用祈默相則遣使走幣足將敬矣何必躬奉神像獻寶  
香如佛老所爲哉因歷陳五不可亦不報宸濠反江西  
帝南征示威武駐蹕留都者踰歲澄屢請回鑾及駕返  
通州用江彬言將卽賜宸濠死澄據漢庶人故事請還  
京告郊廟獻俘行戮不從中官王堂鎮浙江請建生祠

西番闡化王使者乞額外賜茶九萬斤澄皆力爭不聽  
王瓊欲陷彭澤澄獨白其無罪武宗崩澄偕大學士梁  
儲壽寧侯張鶴齡駙馬崔元太監韋霏等迎世宗於安  
陸既至將謁見有議用天子禮者澄曰今卽如此後何  
以加豈勸進辭讓之禮遂廢乎世宗踐阼甫六日有旨  
議興獻王主祀及尊稱五月七日戊午澄大會文武羣  
臣上議曰考漢成帝立定陶王爲皇太子立楚孝王孫  
景爲定陶王奉共王祀共王者皇太子本生父也時大  
司空師丹以爲恩義備至今陛下入承大統宜如漢定  
陶王故事以益王第二子崇仁王厚炫繼興王後龔興  
王主祀事又考宋濮安懿王之子入繼仁宗後是爲英



宗司馬光謂濮王宜尊以高官大爵稱皇伯而不名范鎮亦言陛下既考仁宗若復以濮王爲考於義未當乃立濮王園廟以宗樸爲樸國公奉濮王祀程頤之言曰爲人後者謂所後爲父母而謂所生爲伯叔父母此生人之大倫也然所生之義至尊至大宜別立殊稱曰皇伯叔父某國大王則正統既明而所生亦尊崇極矣今興獻王於孝宗爲弟於陛下爲本生父與濮安懿王事正相等陛下宜稱孝宗爲皇考改稱興獻王爲皇叔父興獻大王妃爲皇叔母興獻王妃凡祭告興獻王及上箋於妃俱自稱姪皇帝某則正統私親恩禮兼盡可以爲萬世法議上帝怒曰父母可更易若是耶其再議其

月二十四日乙亥澄復會廷臣上議曰禮爲人後者爲之子自天子至庶人一也興獻王子惟陛下一人既入繼大統奉祀宗廟是以臣等前議欲立崇仁王厚焮主興獻王祀至於稱號陛下宜稱爲皇叔父興獻大王自稱姪皇帝名以宋程頤之議爲可據也本朝之制皇帝於宗藩尊行止稱伯父叔父自稱皇帝而不名今稱興獻王爲皇叔父大王又自稱名尊崇之典已至臣等不敢復有所議因錄程頤代彭思永議濮王禮疏進帝不從命博考前代典禮再議以聞澄乃復會廷臣上議曰臣等會議者再請改稱興獻王爲叔父者明大統之尊無二上也然加皇字於叔父之上則凡爲陛下伯叔諸



皇朝通志卷之二十三  
父皆莫能與之齊矣加大字於王之上則天下諸王皆  
莫得而並之矣興獻王稱號既定則王妃稱號亦隨之  
天下王妃亦無以同其尊矣况陛下養以天下所以樂  
其心不違其志者豈一家一國之養可同日語哉孔子  
所謂事之以禮者其他推尊之說稱親之議似爲非禮  
推尊之非莫詳於魏明帝之詔稱親之非莫詳於宋程  
頤之議至當之理要不出於此并錄上魏明帝詔書當  
是時帝銳意欲推崇所生而進士張璠復抗疏極言禮  
官之謬帝心動持澄等疏久不下至八月庚辰朔再命  
集議澄等乃復上議曰先王制禮本乎人情武宗旣無  
子嗣又鮮兄弟援立陛下於憲廟諸孫之中是武宗以

陛下爲同堂之弟考孝宗母慈壽無可疑矣可復顧私  
親哉疏入帝不懌復留中會給事邢寰請議憲廟皇妃  
邵氏徽號澄上言皇妃誕生獻皇實陛下所自出但旣  
承大統則宜考孝宗而母慈壽太后矣孝宗於憲廟皇  
妃宜稱皇太妃則在陛下宜稱太皇太妃如此則彝倫  
旣正恩義亦篤疏入報聞其月帝以母妃將至下禮官  
議其儀澄等請由崇文門入東安門帝不可乃議由正  
陽左門入大明東門帝又不可澄等執議如初帝乃自  
定其儀悉由中門入時尊崇禮猶未定張璠復進大禮  
或問帝益嚮之至九月末乃下澄等前疏更令博採輿  
論以聞澄等知勢不可已謀於內閣加稱興王爲帝妃



爲后而以皇太后懿旨行之乃疏言曰臣等一得之愚已盡於前議茲將仰慰聖心使宜於今而不戾於情合乎古而無悖乎義則有密勿股肱在臣等有司未敢擅任遂於十月二日庚辰以慈聖皇太后旨加興獻王號曰興獻帝妃曰興國太后皇妃邵氏亦尊爲皇太后宣示中外顧帝雖勉從廷議意猶嫌之十二月十一日己丑復傳諭加稱皇帝內閣楊廷和等封還御批澄抗疏力爭又偕九卿喬宇等合諫帝皆不允明年嘉靖改元正月清寧宮後二小宮災澄復以爲言會朝臣亦多諫者事獲止澄端亮有學行論事侃侃不撓帝欲推尊所生嘗遣中官諭意至長跪稽首澄駭愕急扶之起其人

曰上意也上言人孰無父母奈何使我不獲伸必祈公易議因出囊金畀澄澄奮然曰老臣悖耄不能曠典禮獨有一去不與議已耳抗疏引疾至五六上帝輒慰留不允二年二月疾甚復力請乃許之舟次興濟而卒先是論定策功加澄太子太傅廕錦衣世指揮同知皆力辭不受帝雅敬憚澄澄雖數忤旨而恩禮不衰旣得疾遣醫診視藥物之賜時至其卒也深悼惜之贈少傅諡文簡明史澄爲百歲翁弼之孫七歲能詩武選司陳愷妻以甥女徐官尙書時宸濠僞爲孝行請表又請撫按諸臣以朝服進見澄據禮覆奏正辭飭之都御史彭澤素失錢寧意又與王瓊有隙坐哈密事將寘重典命廷臣



會議眾莫敢發言澄抗言曰天下皆知彭澤爲國宣力使無故殺之何以示後世瓊顧吏部尙書陸完曰何如完曰憲清言是澤得未減議禮時霍韜再移書於澄言今日主濮議非是澄議益堅澄心坦夷學識淳正居恒謙抑自下至義利所在確然不可拔云

朱希周字懋忠崑山人徙吳縣高祖吉戶科給事中父文湖廣按察副使希周舉宏治九年進士孝宗喜其姓名擢爲第一授修撰進侍講充經筵講官劉瑾摘修會典小疵降修撰孝宗實錄成復官久之進侍讀學士擢南京吏部右侍郎閔五年召爲禮部右侍郎時方議大禮數偕其長爭執會左侍郎吳一鵬奉使安陸尙書席書

未至希周獨理部事而帝方營觀德殿令協律郎崔元初習樂舞生於大內太常卿汪舉劾之帝遂令太常官一人同入內教習希周上言太常樂舞有定數不當更設帝不從舉復爭帝責其妄議而是時張璉桂萼已召至益交章請去本生之號帝悅從之趣禮官具上册儀希周率郎中余才汪必東等疏諫曰陛下考孝宗母昭聖三年矣而更定之論忽從中出則明詔爲虛文不足信天下祭告爲瀆禮何以感神祇且本生非貶詞也不妨正統而親之義寓焉何嫌於此而必欲去之以滋天下之議時羣臣諫者甚眾疏皆留中遂相率詣左順門跪伏希周走告諸閣臣曰羣臣伏闕公等能坐視乎亦



借羣臣跪伏以請帝聞大怒命希周與何孟春等俱待  
罪而盡繫庶僚於詔獄明日上章聖皇太后冊文希周  
及尚書秦金獻民趙鑑趙璜侍郎吳孟春都御史王  
時中大理少卿張縉徐文華俱不赴帝怒責陳狀希周  
等伏罪復嚴旨譙責乃已而是時庶僚繫獄者猶未釋  
希周上言諸臣狂率固不可宥但今獻皇帝神主將至  
必百官齋迎乃克成禮乞早寬縲絏用襄大典不納大  
禮遂自此定矣其明年由左侍郎遷南京吏部尚書嘉  
靖六年大計京官南六科無黜者桂萼素以議禮嗾希  
周且惡兩京言官嘗劾己因言希周畏勢曲庇希周言  
南京六科止七人實無可去者臣以言路私之固不可

如避言路嫌誅責之尤不可且使舉曹皆賢必去一二  
人示公設舉曹皆不肖亦但去一二人塞責乎因力稱  
疾乞休溫旨許之仍敕有司歲給夫廩林居三十年中  
外論薦者二十餘疏竟不復起性恭謹不妄取子卒年  
八十有四贈太子少保瀕沒屬諸子曰他日倘蒙易名  
典勿犯吾家諱乃避文諡恭靖明史朱氏自文再徙吳縣  
仍以崑籍起家希周善事親初官修撰父按閩還朝念  
母王家居稱疾歸省二年還職充經筵講官甲子母王  
卒自京扶櫬至張家灣登舟徒跣行六十里人以爲難  
前後居兩喪一循古禮庚午主應天試生平不蓄媵侍  
喪偶獨居兀坐終日几席無傾倚盛暑衣冠必整所居



皇朝詞林典故卷二十三  
吳趨里紛華相屬希周一室蕭然服御儉樸人不知其  
爲公卿也里中後進稍蕩佚輒曰恐玉峯先生知之玉  
峯希周自號也御史彭宗皋爲希周建崇德坊購他姓  
久廢石柱希周命返之不可召其主而厚與之直晚結  
廬陽抱山祖塋之側以文史自娛子景固以廕官太常  
典簿終南京都督府都事孫衍字蕃卿以吳縣籍登隆  
慶庚午舉人由宜興教諭遷房縣知縣

顧潛字孔昭鼎臣從子十九領鄉薦宏治丙辰成進士選  
庶吉士改授山西道御史庚申奉敕往山東河南印馬  
匹上疏論列馬政五事言折包子粒俵買等項軍民互  
累乞復洪永舊制上勅所司罷行之壬戌在告輯唐虞

以來事可爲法者附以論斷名稽古治要言祖宗列聖  
凡任官命將用刑行政必召輔弼侍從之臣講論商榷  
邇來勢分殊絕君臣相遇不過視朝數刻而已願乞亟  
接臣下或召對便殿或臨幸內閣於以察納忠言訪求  
治理癸亥還朝上之上嘉諭留覽補山東道御史自此  
數顧問諸大臣人以爲潛實啓之畿輔災疏論時政八  
事皆見採納光祿少卿祝祥以附外戚進太常卿崔志  
端以道流累官禮部尙書潛率同官論劾相繼罷去出  
督京畿學政以順德永平諸郡士鮮知學擇其秀穎者  
令之京師從名師受業士風丕變正德初劉瑾用事吏  
部尙書劉宇瑾黨也其子爲畿輔令謁潛潛不爲禮銜



之乃出潛爲馬湖知府未任旋罷歸潛生平以禮自持  
燕居如對賓客時手一編不問戶外事嘗著慎獨箴以  
自警而於族黨困乏周卹惟恐後邑西北巴城湖漫溢  
爲患潛爲築隄以便行旅家居侍親又十二年於舍南  
鑿池疊山爲展桂堂以娛之子夢圭夢川俱自有傳  
周倫字伯明宏治己未進士授河南新安知縣歲旱飛蝗  
雲集倫徒跣虔禱三日大雨蝗皆負草死明年大水疏  
請停派未發寄養馬匹從之又倣古常平法減價糶穀  
以濟飢民會長堤潰請於巡撫以粟募民築堤堤成民  
亦得食濬諸鄉水道教民耳以灌田自是始廣種水稻  
擢御史疏請止乾清宮作佛事及近邊州縣正官進香

時宣大有警疏陳六事皆中機宜下兵部議行尋命巡  
視居庸龍泉等關軍務正德初奉敕勘太監李興擅伐  
禁林山木奏入上嘉其直聞父病請急歸而父已卒劉  
瑾用事以除喪還京違限勒致仕又以曾薦御史雍泰  
及論西庫花米積弊罰米三百石傾其家瑾誅復官疏  
論宿弊五事其囚犯紙罰遂著爲令疏薦謝遷劉大夏  
許纘謝丕許誥李熙向以迂瑾見黜亟宜錄用又劾奏  
大學士焦芳總兵張洪等時論快焉癸酉巡按山西劾  
副總兵神周十八隘口失利應治疏陳遠軍入事皆從  
之又奏築太原南關新城及武寧關土堡堞口月城凡  
一萬二千丈挑濬濠塹三千餘丈後皆賴之時黃河自



平陸縣至懷慶府三百餘里中清澈五里倫上疏以爲地道泰安之象乞驗兩宮果和洽休徵否又言春秋書大有年紀異非紀祥也陞南京大理丞嘉靖初進少卿遷僉都御史母憂歸服闋改南京提督操江擢工部右侍郎轉兵部拜南京刑部尙書旋改北部侍經筵時輔臣桂萼被論去詔逮其私人李夢鶴等下刑部張璉請解於倫倫不可無何璉召還仍出倫於南部三年謝政歸與里中故舊倡延景約簡樸真率以厚俗興禮爲意又十年卒年八十賜祭葬贈太子少保諡康僖倫爲人坦易而操履特嚴詩詞清健行草有晉人風子鳳鳴

顧鼎臣字九和宏治十八年進士第一授修撰正德初再遷左諭德嘉靖初直經筵進講范浚心箴敷陳愷切帝悅乃自爲註釋而鼎臣特受眷累官詹事給事中劉世揚李仁劾鼎臣汙佞帝下世揚等獄以鼎臣救得薄譴拜禮部右侍郎改吏部左侍郎掌詹事府請令曾子後授五經博士比三氏子孫從之大同軍變張孚敬主用兵鼎臣言不可帝嘉納尋進禮部尙書仍掌府事京師淫雨四方多水災鼎臣請賑饑弭盜報可十七年八月以本官兼文淵閣大學士入參機務尋加少保太子太傅進武英殿初李時爲首輔夏言次之鼎臣又次之時卒言當國帝將南巡立皇太子命言扈行鼎臣輔太子監國御史蕭祥曜劾吏部侍郎張潮受鼎臣屬調刑部



主事陸崑爲吏部潮言兵部主事馬承學恃鼎臣有聯  
自詭必得銓曹臣故抑承學而用崑帝下承學詔獄而  
鼎臣不問十九年十月卒官年六十八贈太保諡文康  
鼎臣官侍從時憫東南賦役失均屢陳其弊帝爲飭巡  
撫歐陽鐸釐定之崑山無城言於當事爲築城後倭亂  
起崑山獲全鄉人立祠祀焉明史鼎臣生時父恂年已踰  
艾恐祿不逮養每夜焚香祝天願減己算以益父壽後  
父年八十八鼎臣及第後兩月卒官修撰時預修孝宗  
實錄正德丙子主順天鄉試嘉靖元年歸省上以講官  
特命馳驛六年赴闕時更定學士首擢爲翰林院掌印  
學士仍充經筵日講官分番撰述誥敕上嘗諭內閣云

鼎臣解說心箴朕思味其義甚爲正心之助昨自寫一  
篇親爲註釋又註視聽言動四箴及製敬一箴敕翰林  
院國子監建敬一亭將前五箴俱勒石其中天下學校  
皆然又諭內閣云洪範一書於帝王爲治之大經大法  
實爲親切欲令鼎臣通篇進講分段記日從容講解務  
盡所言詔免常參專直講讀辛卯西苑無逸殿成命輔  
臣及鼎臣坐講周書無逸篇乙未進尙書教習庶吉士  
趙貞吉等三十人鼎臣疏辭上曰朕以卿講幄舊臣効  
勞有年茲特加秩專委教讀爲國儲才宜從朕命乃就  
職丙申禮部疏請定各廟時享太廟祫享大享諸樂章  
上特命鼎臣專撰丁酉上言財賦積弊條陳四事一暫



真定府志卷二十三  
議差官總理二查田糧舊額三催徵歲辦錢糧四查復  
預儲食糧戊戌主考會試己亥上南巡承天賜耳刻留  
守關防又賜銀印一文曰經幃首選鼎臣開陳七事懇  
專事任上皆手批可其奏諭有軍國重事卽用欽賜印  
記來聞尋爲臺臣所論再疏乞休上溫旨慰留庚子五  
月感寒病噎上遣醫視疾賜賚特厚八月病甚草遺疏  
勸上親賢圖治興水利復鹽法修邊備復河套皆國家  
經久大計子履方字仲立嘉靖戊子舉人當父柄用日  
謙抑如寒士年五十卒贈尙寶司丞履方子謙亨字嘉  
甫以廕官尙寶卿簡約有守無忝清門世德云

周廣字充之宏治十八年進士歷知莆田吉水二縣正德

中以治最徵授御史疏陳四事畧言三代以前未有佛  
法况喇嘛尤釋教所不齒耳貫銅鑲身衣赭服殘破禮  
法肆爲淫邪宜投四裔以禦魍魅奈何令近君側爲羣  
盜興兵口實哉昔禹戒舜曰無若丹朱傲惟慢遊是好  
周公戒成王曰無若商王紂之迷亂醜於酒德今之伶  
人助慢遊迷亂者也唐莊宗與伶官戲狎一夫夜呼倉  
皇出走臣謂宜遣逐樂工不復籍之禁內乃所以放鄭  
聲也陛下承祖宗統緒而羣小獻媚熒惑致三宮鎖怨  
蘭殿無徵雖陛下春秋鼎盛獨不思萬世計乎中人稍  
有貲產猶蓄妾媵以圖嗣續未有專養螟蛉不顧祖宗  
繼嗣者也義子錢寧本宦豎蒼頭濫寵已極乃復攘奪



貨賄輕蔑王章甚至投刺於人自稱皇庶子僭踰之罪所不忍言陛下何不慎選宗室之賢者置諸左右以待皇嗣之生諸義兒義子俱奪其名爵乃所以遠佞人也近兩京言官論大臣禦寇不職者陛下率優容卽武將失律亦赦不誅故兵氣不揚功成無日川原白骨積如邱山夫出師十萬日費千金今海內困憊已骨見而肉消矣諸統兵大臣如陳金陸完輩可任其優游玩寇不加切責哉請定期責令成功以贖前罪寧見疏大怒留之不下傳旨謫廣東懷遠驛丞主事曹琥救之亦被謫寧怒不已使人遮道刺廣廣知之易姓名變服潛行四百餘里乃免武定侯郭勛鎮廣東承寧風旨以白金試

廣廣拒不受伺廣謁御史攝致軍門箠擊幾死御史救之始解越二年遷建昌知縣有惠政寧矯旨再謫竹寨驛丞世宗卽位復故官歷江西副使提督學校嘉靖二年舉治行卓異擢福建按察使鎮守中官以百金餽廣貯之庫將劾之中官懼謝罪自是不敢撓六年以右僉都御史巡撫江西墨吏望風去將限豪右田不果明年拜南京刑部右侍郎居二年暴疾卒嘉靖末贈右都御史廣初以鄉舉入太學師章懋在里閭與魏校友善平生嚴冷無笑容居官公強弗受託士類莫不憚之明史廣少孤貧厲志篤學官莆田時鎮守中官於守令初至必要重賄廣獨徒手直入及下車廉公自敕不發私書不



受請謁改知吉水吏事益精知建昌逆濠遣使肆行誅  
求悉禁不與俄假公便歸崑寧懷舊恨再謫竹寨丞丞  
無房屋築茅舍居之與子弟講誦不輟會辰沉兵備構  
明山書院聚諸生講解辟廣爲師寧誅召復御史遷江  
西僉事進副使改提學考校諸生先行檢後文藝以身  
範之詩文古淡自成一家言卒後數年予葬祭又三十  
餘年贈官子士淹字孺亨年十三從父竹寨慨然有志  
於學閱三載還里從魏校遊講求復性之學校之門人  
或始從而終背之惟士淹篤守師說不變事母以色養  
對妻子如賓客人稱篤行君子嘉靖丁酉舉於鄉

方鵬字時舉祖盛太傅王鏊所稱槐庭先生羽儀吾鄉者

也父麟以長厚稱鵬幼岐嶷稍長猶記憶前生事正德  
戊辰與弟鳳同登進士授南京禮部主事歷南京刑部  
員外郎中改吏部時大禮議興張璉桂萼皆在南部謂  
鵬曰今上卽位與宋英宗不同豈可援爲口實鵬曰英  
宗爲濮安懿王少子仁宗親取而立之今與獻帝止上  
一子與宋事遼絕繼統不繼嗣萬世不易之正論也因  
作書一篇以明之未幾陞浙江參議遷山西提學副使  
張桂議行召爲右春坊右庶子兼翰林院修撰充經筵  
講官主順天鄉試時張璉入相事多更張不治人望與  
鵬論頗不合鵬移疾請告會遷南京太常寺正卿遂致  
仕歸家居十餘年與弟鳳同居南瀆里足迹不入城市



真華國集卷之三十一  
獨坐一齋以著述爲事詩文典雅無雕琢之習  
方鳳字時鳴初受學於兄鵬同登進士授行人擢南京御  
史母喪服除改北京出按真定時武宗數事遊幸鳳累  
疏切諫在真定職當迎駕奏不能從詔者七事上皆優  
容之病假歸尋起補故官復改南凡歷南北御史四任  
嘗疏救胡世寧薦王守仁楊一清呂柟魏校及論吳中  
水利事皆天下大計嘉靖初張璉桂萼以議禮驟貴鳳  
力言其非以兄附張桂議并劾之復自劾以謝兄出爲  
廣東提學僉事旋自免去鳳與鵬素友愛及議禮各行  
所是鳳歸鵬亦繼之鵬善病多下帷靜坐鳳性逸宕多  
管絃之樂山林觴詠未嘗不怡怡如也年七十七卒子

築字居道嘉靖乙酉舉人唐府長史範字循道萬曆甲  
戌進士銅仁知府築子元儒字思曾嘉靖庚子舉人與  
吳中英歸有光沈世麟輩並以文學著稱早卒

柴奇字德美正德辛未與弟太同登進士奇觀政吏部時  
楊一情爲太宰發策試諸進士奇上書言東南水利先  
以白茆爲急次疏七鴉浦葺五堰且請以沒入逆瑾資  
濟工費一清上其議於朝特命工部尙書李充嗣司其  
事績用告成是歲授吏科給事中奉詔監軍山東討流  
賊舉劾功罪皆當明年賊陷曲阜至侵犯闕里奇奏遷  
曲阜城以護聖廟賊平加俸二級有白金綵帛之賜內  
艱服除補原官陞南京光祿少卿嘉靖己丑遷應天府



丞旋進府尹清勘官占地還之民間積科試羨餘以拓  
貢院會南太廟災引咎乞休家居十餘年卒年七十三  
賜祭葬奇居諫垣敢言事退輒焚其草今黼菴集所載  
獨諫南巡劾錢寧二疏而已季子秩自有傳曾孫堯年  
字欽甫萬曆丙戌進士官同安知縣堯年孫允璧字林  
徵天啓辛酉舉人俱以學行稱

周鳳鳴字于岐倫子正德甲戌登進士授刑部主事任監  
獄令吏卒滌桮械潔圜室時給飲食手錄爲監獄事宜  
後悉踵行之請急歸起補故官嘉靖癸未遷員外歷郎  
中奉敕勘宸濠逆黨審覈詳慎無枉縱者內艱服闋復  
除本部鳳鳴在刑曹久明練法律尙書李承勳知其才

以廣東司所轄錦衣旗校狡橫難制命攝其事數日理  
積案殆盡易州上大盜二人一瘐死一病且殆而誣引  
者六人鳳鳴慮二盜死則六人無以自白乃哺而療之  
果獲真盜六人皆得釋承勳改兵部薦鳳鳴爲職方籌  
邊擇將皆手自記注人莫敢干以私都督馬永以誑誤  
廢及廷推首及永大臣難之鳳鳴曰任將與任官異其  
才不可廢可徇格耶又嘗繪九邊圖以獻欲上知邊隅  
要害庚寅擢大理寺丞值星霾示變應詔上疏其議處  
兵食興水利九切上皆嘉納張孚敬欲陷夏言假薛侃  
疏坐以至使諸大臣莫敢異同鳳鳴獨論言無罪御史  
馮恩以劾孚敬汪鋐下獄鳳鳴擬赦條忤當事意遂落



職家居十八年薦者六十疏竟不起事父倫及繼母至孝父歿詔廕一子以讓其弟鳳起生平饒心計廣廈數十間一經握算尺椽片瓦無漏布政顧夢圭稱其明練如杜元凱勤毖如陶士行介特如楊伯起人以為無愧鳳起字于霄以廕為光祿寺署正終遼左行太僕寺丞鳳起弟鳳來字于舜博洽工文善楷書早卒

顧濟字舟卿正德十二年進士授行人擢刑科給事中武宗自南都還臥病豹房惟江彬等待濟言陛下孤寄於外兩宮隔絕骨月日疎所恃以為安者果何人哉漢高帝臥病數日樊噲排闥入見特警以趙高之事今羣臣中豈無噲憂者願陛下慎擇廷臣更番入直起居動息

咸使與聞一切淫巧戲劇傷生敗德之事悉行屏絕則保養有道聖躬自安不報再踰月而帝崩世宗即位三月濟上疏曰陛下踐阼除弊納諫臣民踴躍思見德化之成然立法非難守法為難聽諫非難樂諫為難今新政所釐多不便於姦豪權倖臣恐盤據既深玩縱未已非依怙宮闈必請託左右持法不固則此輩將叢聚而壞之此守法之難也唐太宗貞觀初每導羣臣使言及至晚年諫者乃多忤旨陛下首闢言路臣工靡不因事納忠高遠者似涉於迂闊切直者或過於犯顏若怒其犯顏其言必不入視為迂闊則計必不行此樂諫之難也尋復言內臣張雄張銳等誑誤先帝業已逮治又獲



寬假願陛下斷以大義俾無所售姦帝頗嘉納既又劾  
 司禮蕭敬黨庇銳等而三法司會訊依違無大臣節不  
 聽帝欲加興獻帝皇號濟言不可尋請侍養歸越數年  
 卒子章志明史濟父鑑孝事二親敦行古誼先世居新安  
 鄉宏治中析置太倉因隸焉鑑徙千墩復為崑山人嘉  
 靖改元濟受命如越祭告南鎮還上八疏一謀始慮終  
 守法納諫以圖盛治二慎聽覽以定國是重綸音以降  
 治體三亟處游民以消姦宄四信法令原情罪以救極  
 弊以重守衛五正亂本以圖新政六守成法慎中旨以  
 一治體絕亂階七拔淹滯抑奔競以勵士風八信法令  
 辨順逆以服人心濟與從兄溱並任南北給事勢望光

顯而濟尤嘉惠鄉土有長者風

張寰字允清安甫子正德辛巳進士授濟寧知州調濮州  
 濮之東郡有賊西洪學常天叙等詔捕不可得寰陰誘  
 其豪具得實捕斬之內艱服除補開州豪民占田以虛  
 租影射下戶寰命魚鱗比次以絕其奸入為刑部員外  
 乞養歸父卒補故官陞通政司右參議尋致仕寰在告  
 時以父春秋高與臥起不異嬰兒嘗奉父觀雁宕登天  
 目父子相隨衣冠儼雅望之翛然世外晚益縱意山水  
 於武夷匡廬石鐘小孤采石九華黃山足跡殆遍又與  
 歸安蔣瑤安仁劉麟等十五人結峴山逸老之社卒年  
 七十五初寰曾祖用禮生四子長稹次和次穆次种稹



生安甫安甫生寰而和生申甫亦登進士鄉人榮之

張羽字子儀幼孤貧向學母王篝燈繡績助讀會外家勾  
伍事波及母子囚繫所司憐其孤寡白之登正德十六  
年進士授工部主事視權蕪湖以寬簡爲商人所戴進  
刑部員外郎大禮議起偕廷臣伏闕諫廷杖幾死改南  
京刑部郎中罷歸闕一圃客至相與嘯咏其間旋以哭  
母喪明林居四十年卒年七十九

屈儒字汝爲昉元孫少負遠志以清修自立爲諸生時先  
塋前隙地隣學宮當道議闢爲尊經閣出厚貲購之儒  
叩頭泣請辭旨愷切上官體其義事遂寢正德辛巳登  
進士會世宗登極詔求直言遂首陳嗣統大禮授南京

大理評事進寺副寺正講讀律令覆讞刑辟以清慎稱

戊子擢福建僉事分治建寧道所至洗冤剔蠹吏民感  
其威惠引疾歸卒貧無以殮縣令郭楠爲經紀其喪

徐申字周翰嘉靖初由鄉舉除蘄水知縣改知上饒徵授  
刑部主事張延齡之繫獄也申奏記尙書聶賢唐龍言

太后春秋高延齡旦暮戮何以慰太后心宜援議貴議  
親例請於帝賢等深然之獄久不決始延齡下獄提牢

主事沈椿不令入獄置別所繼者益寬假之脫桎梏通  
家人出入會大猾劉東山亦繫獄上告延齡有不軌謀

憾前主事羅虞臣答己因訐及椿等帝震怒命執先後  
提牢主事三十七人付詔獄拷掠申與焉獄具當輸贖



還職帝命杖之廷盡謫外任申既謫官不赴與同里魏  
校方鳳輩優游嘯咏爲樂久之卒明史申令蘄水時邑有  
迴風磯最險其一港通圻湖達大江乃按古蹟以竹籠  
篝石塞湖以土實港俾湖水不江江水不湖民以永利  
官主事時昭聖太后弟張延齡以殺人下獄廷議引薄  
昭例將誅之太后怒不食申與郎中周大禮奏請緩死  
後以忤旨廷杖謫湖州推官遂歸溢瀆舊居以老人稱  
南川先生

鄔景和嘉靖二年尙孝宗女永福公主嘗奉詔直西苑撰  
元文以不諳元理辭帝不悅時有事清馥殿在直諸臣  
俱行釐祝禮景和不俟禮成而出已而賞賚諸臣景和

與焉疏言無功受賞懼增罪戾乞容辭免俾洗心滌慮  
以効他日馬革裹尸之報帝大怒謂咒詛失人臣禮削  
職歸原籍時主已薨矣三十五年入賀聖誕畢因言臣  
自五世祖寄籍錦衣衛世居北地今被罪南徙不勝犬  
馬戀主之私扶服入賀退而私省公主墳墓封邱翳然  
荆棘不翦臣竊自念狐死尙正首邱臣托命貴主獨與  
逝者魂魄相弔於數千里外不得春秋祭掃捐心傷悔  
五內崩裂臣之罪重不敢祈恩惟陛下幸哀故主使得  
寄籍原衛長與相依死無所恨帝憐而許之隆慶二年  
復官卒贈少保諡榮簡明史景和字時濟先世以間右徙  
實京師景和氣度凝重能詩善書尙主時年甫十六拜



駙馬都尉侍衛禁庭命掌宗人府事管修玉牒特賜肩輿入直再賜乘馬行禁中寵賚優渥罷歸與從兄克忠優游泉石間閩里榮之既復官疏陳安民足國禦寇平倭四事頗見采納及卒賜祭葬大學士李春芳銘其墓稱其讀書嗜學至老不倦舉動莊肅足為儀法克忠字時弼嘉靖甲午舉人授廣東潮陽知縣調廣平以稱職聞致政歸與景和優游泉石以老按景和雖係貴戚而非以類相從之義不必附見也顧夢圭字武祥潛子年十七舉於鄉嘉靖癸未成進士授刑部主事乞便迎養改南京吏部遷郎中應詔陳六事尤論中官鎮守之害得旨撤還擢廣東參議分守雷廉

行部至遂溪道暍縣令跪獻茶瓜知其貪拒而劾之海北故有平江青鷺楊梅樂民四珠池督採甚急夢圭疏言珠蚌生息甚難三年再採珠已耗竭每採當用兵夫萬計因以為盜近年劇賊黃山秀蓋起於珠池也况蟹戶腰統入海觸犯瘴霧駢首就死實可憫念不報都御史陶諧議剿山西猺空其地填以新民夢圭言猺不可盡殺填以新民勢必吞噬而猺地荒落非土兵所習居後卒從夢圭言父憂服除起江西左參議陞山東副使尋改河南提學副使是年世廟幸安陸道河南省官出迎夢圭攝三司篆有詔宗室惟親王朝行在所夢圭榜詔旨於省門宗王以下無敢佚遊遷福建參政分守延



汀等郡時寇掠連江自浙江入壽寧冬復有浙賊自車  
嶺入松溪崇安建陽夢圭先後捕獲行部千里次第平  
之擢按察使陞江西右布政使致仕歸時年四十餘耳  
夢圭爲人敦重好讀書自奉如寒素然卒年五十九子  
允默自有傳懋宏字靖甫初名燾字茂儉十三補諸生  
才高氣豪以口過被禍下獄事白而家壁立依從父夢  
羽蘄州官舍用蘄籍再爲諸生尋東還遊太學舉萬厯  
戊子鄉薦授休寧教諭遷南國子學錄終莒州知州自  
劾免築室東郊外植梅數十株吟嘯以老

朱觀字頤伯萱從子嘉靖癸未進士授吉安府推官強毅  
明敏郡有殺人而莫得主名者獄久不決臺使檄觀檢  
視觀禱於神夢一人體無完膚恍然曰周身刑憲其周  
憲乎遲明訊之殺人者果其妻之私人周憲也上官奇  
之類此者凡八事擢御史疏請罷放鷹犬清釐光祿積  
弊並從之巡按陝西獎勤極怠墨吏望風自罷奏築花  
馬池至橫城堡邊墻一百六十餘里上以全陝荒饑不  
欲行觀言荒歲民饑正宜召募一舉兩得此范仲淹賑  
濟之良法也上從其請西陲賴之後以言事忤旨廷杖  
出爲福建副使終河南左布政卒於家

秦鰲字子元嘉靖五年進士授行人擢兵科給事中劾魏  
國公徐鵬舉中官賴義不法狀義罷遣彗星見劾張孚  
敬妬賢病國擬議詔旨輒引以自歸帝遂罷孚敬已孚



敬再相汪鉉承風旨以考察謫鰲東陽縣丞屢遷福建  
右參議卒官明史鰲未弱冠里甲中以徭鰲上書邑令請  
竟學令試之文奇之延爲子師後由東陽丞陞樂清知  
縣九江通判德安同知所至有善政陞湖廣僉事湖湘  
盜起捕誅不可止鰲曰盍清其源爲薄稅緩役期年盜  
良已進參議提舉太和山時中官王佐主香案爲民害  
鰲諭之不從投劾歸繼母憂服闋補福建有李八仔者  
訟其叔爲富戶所殺有証驗富者行金抵八仔獄繫久  
不決鰲讞而直之陞副使轉參政入覲還道病報遷接  
察使而卒少讀葉盛西垣奏草慕其爲人故居諫垣多  
所論白曰吾不負國亦不負文莊也

周大禮字子和嘉靖壬辰進士授刑部主事坐誣誤壽寧  
侯事謫鄧州同知遷汝寧府同知尋轉南京工部郎中  
勘除宗人糧餉虛籍省費鉅萬出知興化府歲大饑請  
臺省發廩仿宋趙卞蘇軾救荒法自乘竹輿齋粟隨地  
贍之時米價騰湧所在有司議行平糶大禮獨令高其  
價於是商販輻輳價立減又興木蘭障水之役以備旱  
潦凡繕陂二十餘里饑民得粟益多又嚴督里書稽覈  
田賦以清下戶之產廢稅存者治郡七載惠政甚多獨  
於權貴豪強必裁之以法不少假御史得謗書幾一篋  
心疑之猝遣吏詣府取紙贖簿贖大禮立吏庭下封簿  
畀之勾校無漏失御史大服更爲薦引擢廣東副使有



兇徒十人號十條龍爲患一方大禮未下車已訪其實  
甫蒞任十條龍儼然乘軒來謁大禮卽拘而杖殺之舉  
國稱快連更兩喪服除起山東登萊副使海濶捕魚者  
時闌出貨物爲奸利吏取緡錢姑縱之大禮弛捕禁加  
闕出者罪民莫敢犯御史何廷鈺議鑿膠萊河以便漕  
輓大禮言河塞久竭民力不能成流卽成流不能達天  
津須三四搬駁耗費何出議遂寢擢河南參政有詔糴  
麥河南所司議檄郡縣追比積逋以應大禮曰河南民  
甚貧逋且久非旦夕可辦而糴麥又不容緩請藩司提  
編銀備糴而後征逋還司所司從之丙辰大計坐拾遺  
免歸卒年六十七子之誦字燕生之豐字京生之豐初

與兄齊名而賅瞻過之天性孝友哭父兄過毀病噎卒

大禮僕周壽謹慎機警出入必隨大禮杖殺十條龍後  
其黨陰伏海濱圖報復及去任航海歸惡黨劫於舟次  
壽潛易衣冠兀坐以待賊蜂擁入舟壽鬚眉如戟瞋目  
厲聲曰若何爲者賊不辨劫其首而去大禮獲免乃殮  
其屍刻木首而函之歸葬於岡區  
白字圩之原使子孫春秋祭祀焉

周復俊字子籲初名復辰知州在之子嘉靖壬辰成進上

授工部都水主事兩奉命採青滇南所至例有貺遺峻  
不受圖其山川一卷以歸進本司員外督木張家灣輸  
木鉅萬延積至數里主納無期吏胥因而下上乃創立  
四門建牙牌於左商人自以貫序執牌入隨檢詳徵發  
羣僉呼稱便晉郎中擢四川提學副使副使率受裁巡  
方復俊獨特風紀請託不行卒以刻覈嬰忌請養歸母



喪服闋補雲南副使備兵鹿滄有土獠據赤崖爲叛地在西洱海中島嶼險塞出沒三郡間勢張甚復俊與永昌副使李樂密謀餌諸蠻之來附者以夷攻夷賊知撫臣難以用兵不爲備乘其懈直搗而殲之民不罷市而海波旋息上功最柄臣嚴嵩父子以無書饋格不行就轉左參政進四川按察使所積贖鍰例充私餽復俊悉付守藏吏繕治諸館舍橋梁撫臣移檄來取竟弗與遷右布政調雲南左布政益自勤慎考覈庶僚無少瞻徇滇中歲課黃金寶石藩臬掌之曾未少染土酋長兼理郡縣輒獻珍異求庇固弗與通故事左使滿考當晉中丞次亦京兆尹以失執政意量移南京太僕寺卿致仕

隆慶初詔進通議大夫資治尹萬曆二年卒年七十九復俊器度純雅學問賅博嘗遊方鵬門精研理要與王同祖顧夢圭稱崑山三傑在滇時與楊慎切劘其學益邃生平敦內行母吳性嚴切小拂意輒呵責復俊卽長跪色解乃已入蜀行九坂崎嶇地車上驚呼復俊必下車扶掖至平地始復升車偶因酒過母誠之遂止酒至老弗御父歿時復俊尙少喪葬悉自枝不以煩兄方授箸日兄選膏腴而以汗邪與復俊值歲荒復俊獨有秋復推其半與兄終身敬愛無間言子泉字若蒙由太學授襄府良醫正不赴築雲東草堂於山南以娛侍其親工醫術孫元暉字叔懋萬曆丙戌進士官雲南道御史



元昭字季榮丁酉舉人興安知州元昭孫家玉字載璜  
崇禎丙子舉人 國朝順治初侍郎李延齡開幕府於  
郡城承制拜湖州知府堅辭不就後官儀徵教諭  
張情字約之嘉靖戊戌進士授處州府推官時中官銜命  
採礦俄報罷姦人乘之嘯聚情蠲其逋負加意撫輯乃  
安金鄉磐石二衛累世相構情探其根悉爲解之御史  
舒某意弗善也情以特徵將顯擢御史故稽其期僅遷  
刑部主事以母老乞便養改南京兵部累遷郎中母卒  
服除補南京車駕司出知九江府清靜儉約務爲休息  
草沒訟庭輿皂至織屨自力會調三峒兵備倭所過縱  
暴他郡多杜門遣犒情獨郊勞酋帥飲食其從者咸感

悅相約束往來九江若不知有兵者取魚陂之直築六  
門月城不以煩民遷福建兵備副使倭寇方急情提一  
旅抗之先後斬獲數百人遂解連江之圍病假歸又七  
年卒弟意字誠之少與兄居安亭父禎授之書情讀不  
輟意頗好弄而慧均及課限先情十年以嘉定籍聯捷  
嘉靖戊子己丑登第授工部主事時營九廟奉敕採木  
湖廣遷郎中工成進兩階擢山東副使意性高簡有部  
民貸人千金不能償飾豔妓爲妻挑之使折券復以強  
占訟之御史論子錢家死意曰娼也當坐詭陷者遂互  
糾坐罷歸而貧甚子之梅善治生每具珍膳聲歌以娛  
其志意好遊布帆席帽遠至黃山九華雁宕悉探其勝



卒年六十七情子應文應武應忠孫振德別有傳

李憲卿字廉甫世居羅巷村以農爲業父玉字廷佩以孝友稱憲卿登嘉靖戊戌進士授南京吏部主事歷遷郎中陞江西參議山東副使湖廣參政尋以河南按察使進僉都御史巡撫湖廣奉天殿災命大臣開府江陵採辦大木特擢憲卿副都御史總其事事竣召回院明年掌外計以疾乞歸卒於東平之安山驛憲卿器局峻整與人交涇渭了了然終不言人之過在江右以南昌新建稅額獨浮請於三郡行均田法折衷簡易人咸便之備兵臨清師尙詔反走莘縣憲卿遣兵計擒之其撫湖廣值水災急請蠲貸親行鄂渚雲夢間撫循倍至江浙

有倭警督撫檄調容美等土兵憲卿言越數千里徵兵虛糜傳給非計也後土兵不戢憲卿約束之使悉遷所掠帝雅信重之故採木之命出自特簡先是建九廟營西宮悉徵荆蜀以故近水無巨材憲卿始行巴峽轉荆岳至東南川鈎取之不能如制乃上言臣奉命督遣藩臬分道四出又偕湖廣四川貴州三省撫按臣往來搜訪而巨材必生於窮山荒裔中又鮮不空澗者欲與舊制圍長並合誠難臣以爲量材取用便制臣曰可其後木亦稍出自江淮至京師簿筴相接凡得木萬一千二百十章遂疏請罷採以休荆蜀民詔從其議時方考卜建殿西宮繼與僉慮見材不給比徹工願益奇羨廷臣無



不推其能論功最悉推讓三巡撫下至小官無不錄其勞巡歷三省皆深林巉谷峻溪絕坂吏民披荆榛犯瘴毒與蛇虎錯行而憲卿施設得宜購賞倍常故三年間民夷不驚皇極殿成方叙任事之勞而憲卿已不逮論者惜之卒時年五十七贈右都御史

周美字濟叔父崑業農有隱德以上壽終美幼慧而貧沈大楠一見奇之引與子紹慶同學授以易遂精其旨登嘉靖甲辰進士授進賢知縣清強有守有里豪匿賦美盡出之會山寇平得巢木千章豪請以治第復不應益銜之入覲謁政府獨不贊乃遷刑部主事進員外出爲湖廣僉事備兵蘄州蘄地當洞庭之交稱盜藪白晝揚

帆剽掠美立團操法作戰艘令材官日巡江上所獲盜獄成卽殪之或折其脛盜相戒無敢犯撫按以採木令急議發興山礦助工美曰礦入天府泰山壞壤耳亡命一聚利不補害事竟寢公暇進蘄子弟講易義與作文之法自是人多知學陞四川參議適理黃冊美素習勾股磨算最精遷廣東副使外艱歸有誣以受贓枉法者遂致仕美起家艱難清操自勵忽滋讒謗憤懣不平以狂疾卒不數年其子不能自活流落至蘄蘄人爲之婚娶因家焉

周後叔字允昌百十六歲翁壽誼八世孫嘉靖庚戌進士授工部主事視權荊州政務寬簡遷員外郎楊繼盛劾



嚴嵩坐死後叔賦詩哭之又其騎與嚴世蕃爭道世蕃怒屬吏部摭其過謫武岡州同知州故有岷王頗驕橫後叔言之御史稍繩之尋遷金華府同知郡有劇盜出沒爲害後叔令市魁闌入佯與之通而鈎其虛實往來勒卒伏弩覆其巢御史銜命訪求異人所至苛擾後叔逆諸境曰郡僻小孝弟力田間有之實無異人可塞明詔御史慚去進知府坐與御史爭試事被劾歸營室東林蕭寺左度曲養疴卒年五十二

顧章志字行之濟于嘉靖癸丑進士授行人時嚴嵩父子鬻權人爭趨之章志獨不往歷司副司正刑部員外郎中出知饒州府饒瀕湖多盜其民悍而好鬪吏稽違萬

狀章志平心鈎校凡三閱月召吏立庭下摘其尤貪黠者朽數十人寘重法三四人庭無滯獄其後待訊者不齋糧以爲常景德鎮陶利被天下五方亡命所集又地與安仁相錯競利而鬪嘯呼者以千數章志適行部至就輿占牘諭以禍福立解散擢湖廣副使乞養歸母喪服除補廣西副使尋進貴州參政廣西按察使乞休家居七年復以原官補山東旋陞南京光祿卿應天府尹進南京兵部右侍郎南京馬快船爲上供所需衛卒領之猝有差遣每爲中官摧剝卒多逃亡軍伍日虛章志用郎中倪涑策仿雇役法募篙師爲役官以馭之而稍益其直減其船額歲約費二萬五千金米三萬石衛士



輸丁銀萬五千金又以除額願輸米二萬朝廷但蠲銀  
萬兩米萬石費小而惠大疏上報可著爲令又疏重事  
權明激勸嚴參罰預會計四事以圖經久未幾卒於位  
其喪之歸衛士爐香哭於道者相屬詔贈右都御史南  
都人祀之子紹芳紹芾

張憲臣字欽伯家世力田父洪嘗得遺金一囊停舟俟失  
者還之憲臣性寬大多隱行其德登嘉靖己未進士授  
南昌知縣初至積案如山黠吏操牘雜進以試憲臣辨  
其緩急詰責之自是無敢溷者南昌壤接分宜御史段  
某行縣問庫羨幾何意欲以饋嚴嵩憲臣曰有之乃三  
殿工羨也餘無他羨御史怒嵩聞之亦怒遺書總憲欲

罷之無何嵩敗會議行取吏部以憲臣無薦難之總憲  
出嵩書曰此不足當薦牘耶遂拜工科給事中疏論賦  
役水利等四事尤加意東南財賦又論武庫甲仗宜付  
外不宜盡屬中官兩畿試不宜誘教官咸報可歷吏刑  
二科進戶科都給事中三疏論國漕大計悉下所司行  
之出爲浙江參政分守金衢嚴三府先是礦寇之平多  
藉義烏人力後乃驕橫難制憲臣錄其豪自隨躬爲訓  
練而餼之由是人知自愛遷雲南按察使尋甸土酋死  
其婦安移文欲得西川酋某爲夫憲臣揣知姦人詐爲  
牒將構難於安不許俄而詐果露尋以都御史某修隙  
免歸卒年六十二孫魯得魯傳魯唯俱別有傳



王執禮字子敬秩孫少孤貧力學從歸有光受經因旁及子史有光曰吾十年理學當以相與嘉靖乙丑與有光同登進士觀政兵部尚書楊博令諸進士各條其鄉兵政所宜執禮上備倭議博喜稱爲東南有人授建寧府推官直指胡某意在發摘隱伏間所知甚急執禮徐曰人才不甚相遠公策勵而器使之皆可以爲才卽公指數某某盡耳而目之耶直指意初不然久之乃稱其績密有張生者誣貧民爲盜執禮出之張故大族姻黨多貴顯力爲營請執禮持不可曰殺人媚人吾不爲也竟論如法入爲南京刑部主事尋改北京刑部福建司主事以母老乞終養凡十年母卒服除補儀制司主事歷尚寶丞光祿少卿大理丞應天府丞年七十卒執禮幼嗜學卽隆冬盛夏必手一編每校讎按甲證乙未嘗苟安疑義尤精醫理雖編戶下走必應之不倦子協康協嘉並諸生能世其業

陳允升字晉卿太平教諭彝曾孫隆慶戊辰進士除開州知州州有種馬一千六百有奇分派孳生輸戶輸京師有銀差力差勢豪多銀差解銀稍易小民任力差解馬多致破產允升按冊均撥始不病民又徭役失均乃取編戶按甲乙列爲九等廉其弊析爲兩冊隨地隨人諮其利害使書於簡期年戶口消長之數瞭然徭乃大辨擢兵部員外郎陞湖廣提學僉事丙子秋將放榜先書



所拔士二十一人縣鼓而揭之與吏約每雋一人鼓三  
之旦起鼓聲不絕雋者十九人矣楚人傳其事以爲神  
允升開敏有才勇於赴義自楚歸歲大祲以書抵張居  
正祈蠲賑詞旨激切語侵撫臣頗受齟齬然吳民實賴  
焉年七十二卒子如京字鄂州萬曆甲午舉人台州推  
官有衛士索餉於府而課者如京至平氣以待之衛士  
伏謁如禮如京已廉其黠者置之法嘗視篆太平削掛  
馬包納等弊省民脂數千以勞得疾卒於官

朱熙洽字鴻甫爲諸生三十年以歲貢中萬曆癸酉順天  
鄉試明年成進士授潛江知縣縣故土城當漢水下流  
善崩潰臺司檄令改築而費無所出其邑之田有藩封

有軍屯又別隸各河泊所爲漁課勢不可理而漁賦僅  
十一豪民乘貧民求售往往以民田約以漁田剗遂多  
田去賦存按籍責償卽逋逃以免熙洽矍然曰吾知所  
以築城矣爲設方畧請之當道屬里宰履畝而溝封之  
其藩者屯者漁者按籍各歸其故田盡出因令民得入  
貨自占積金萬餘卽與役築城易土以甃無加賦無擾  
民四閱月而事竣遷南昌府同知辨豪右僞券調辰州  
清鹽木二稅入爲刑部員外郎出爲福建僉事晉參議  
陞貴州副使皆以清嚴著謝政歸熙洽艾年服政矜慎  
方嚴才識練達嘗語人曰吾三日不視事則神不疑一  
日課數十事則手足矜奮晉膺有力年八十三卒孫日



燦字靜之萬曆壬子領鄉薦選懷遠教諭入爲國子博士陞監丞甫一月城守需人添註工部授營繕主事所至與中官牴牾而一塵不染陞員外郎督臨清磚廠大兵逼臨清日燦方堅守新城太監高起潛之兵適至檄道臣高捷以河西浮橋濟師河西民擁衆拒之捷逃匿日燦馳至反覆開諭民乃服師濟城以完尋罷歸甲申南都立起補工部旋陞福建參政道梗不果行子陞臣歲貢生富陽知縣

張棟字伯任萬曆五年進士除新建知縣徵授工科給事中請盡蠲天下逋租格不行時蠲租例相沿但蠲存留不及起運棟請無拘故事從之再遷刑科左給事中吳

中白糧爲累民承役輒破家棟請令出貲助漕舟附載申時行王錫爵絀其議棟遂移疾歸起兵科都給事中劾去南京戶部尙書張西銘刑部侍郎詹仰庇軍政拾遺劾恭順侯吳繼爵宣城伯衛國本忻城伯趙泰修宣府總兵官李迎恩繼爵留餘並罷已言邊臣叙功不宜及內閣部科帝亦從焉遣視固原邊備時經畧鄭洛方議和棟疏言捲力克負固不歸卜失免傑黠如故火落出真相雄據海上不可使洛委責以去因論兵部尙書王一鶚會一鶚已卒洛亦報捲力克東歸遂寢其奏棟又言洮河失事陛下赫然震怒命洛視師豈止欲其虛辭媚敵博一順義東歸畢事耶今火真依海爲窟出沒



自如不宜叙將吏功報聞母卒棟年已六十毀瘠廬墓  
竟卒於墓所天啓中贈太常少卿明史棟爲廣東僉事寬  
曾孫長身秀目談論斬然切事理其令新建也邑多黠  
吏廉其一二榜諸市重者至死清田議起躬行相視按  
壤定賦以其故額六十一則紛雜爲奸數盡去之而定  
上中下三等遂爲永例治以嚴辦闖初任工科上言江  
西燒造之苦上爲減所造之半繼以災傷疏請蠲賑皆  
得俞旨乙酉典試廣西稱得士巡視廠庫立科部互稽  
之法條議荒田改折白糧徭役四事改折議行爲東南  
永久之利進兵科都給事中軍政劾繼爵等及錦衣掌  
印柏子祥執政以棟不先入謁忌之會洮河用兵遣廷

臣分閩邊鎮棟掌科例不應遣政府以中旨遣之先是  
使者出塞旌旗供帳相望棟悉行禁止單騎閱固靖甘  
蘭諸地騎所不能至者徒步以往立石土門乃還旣還  
所上利弊與經畧本兵諸大臣相忤未幾科臣以儲位  
未定合詞上請上怒特斥李獻可棟又抗疏申救嚴旨  
屢下促召緹騎棟張燈候命有餽蚶蛇膽者笑而受之  
俄傳諭落職爲民棟滿引數觥曰本謂鐵石心腸今聞  
緹騎色動凡以爲吾母也旣歸杜門養親舊居山塘廳  
事不容旋馬終無所增時無錫有講學之會以強請再  
三往赴比泊舟望見邑宰俱具卽返棹不再往所遇臺  
司長吏無不敬禮利弊興革必往咨焉里後生有不善



惟恐張先生知天啟中詔錄直言贈官賜祭季子丙字  
幼文郡諸生秉性孤潔毅然有守嘗曰吾未能中行且  
爲狷士顏其齋曰又次韜匿勤修以老

張文柱字仲立棟弟幼有雋才年十二賦關山月詩眾皆  
奇之從父僑居留都耳目開滌學問彌邃與兄棟齊名  
其敏給應變棟自謂弗如也萬曆戊子舉順天鄉試謁  
選得臨清知州州爲南北之衝狡獪之徒窟穴爲奸利  
文柱令刻日聽諸告訐者牘盈千批其不直者九百餘  
紙皆深誅其隱衷其直者聽判決黠吏束手有秦氏嫠  
婦者家鉅富族人將發其陰事以分其業挾當道書屬  
監司就謀之文柱曰此陰事也以族人一言而批決之  
非長者事也乃止在州四年治聲聞遠近暴疾卒文柱  
有至性母柴素嚴稍拂意面壁竟日文柱亦侍立竟日  
色解乃已與兄約他日貴顯當更互出入無使慈幃有  
陟屺之歎後棟以言事罷歸文柱乃出



崑新兩縣續修合志卷二十四  
崑新兩縣續修合志卷二十三終

崑新兩縣續修合志卷二十四

列傳三

李同芳字濟美萬厯庚辰舉禮部第二人成進士授刑部主事遷禮部歷員外典乙酉湖廣試進郎中時上將閱慈寧壽宮例當幸西山費鉅萬同芳曰禮官不止遊幸更導之耶為削去煩例上之出為浙江提學副使絕造請精藻鑑所拔多名士陞湖廣荆南道參政清澧州浮糧卻標兵操賞餘銀止征播調發萬人雪冤辟張福姐等七命陞貴州按察使黔酋安氏方強請與太守班見叱之出班酋又請還新貴縣授甲襲伍土官同芳片言折之不敢仰視其庶孽安國貞請入為氓同芳白巡撫



勿納後跳入西川酋以索叛人爲辭殺蜀民六萬餘而  
黔獨晏然改廣東參政再進按察使會稅礦兩璫在粵  
議增稅六十餘條同芳執不可新會令阿璫指致民變  
揭竿者萬人同芳單車定之陞山東右布政使覈登萊  
民屯以抵兵餉歲減編四萬有奇立常平倉捐俸贖買  
穀十萬石貯之乙卯大饑民賴以濟擢副都御史巡撫  
山東時福王就封賜莊田四萬頃詔覈涇漢故籍以充  
之按視則皆民田或請割瘠田當之則荒田科稅病邸  
病民或請割湖墾與之則昭陽湖直運道後且病國抗  
疏力爭不報遂請告歸已而上思其言卒寢前議東人  
賴之同芳存心仁恕而大節所在侃然不回旋里後杜

門卻埽寂如寒素小有登覽必問故所與遊通情款卒  
年八十餘贈工部右侍郎予祭葬子允昌  
顧紹芳字實甫章志子萬厯丁丑進士選庶吉士移疾歸  
起補檢討父喪服除進經筵日講官遷左春坊左贊善  
管理制誥復移疾歸不兩年卒年四十七紹芳以古學  
自勵好讀先秦兩司馬書濯筋漱骨蘄至大家在庶常  
則又以秀密溫富之詞爲諸吉士冠方移疾歸時與  
其父章志汎覽古今商榷當世之務思有所建白而神  
宗方養靜堂陞萬里又邊警不時人情首鼠天下事度  
無可爲意忽忽不怡性廉介而好義嘗立義學以教族  
人生平不妄交獨與同里張棟相親善王錫爵在政府



嘗與紹芳言自吾居此有昔密而今疏昔嘵嘵而今靜  
默者何故對曰此不足訝如芳與公分故不薄然不能  
以無味之身數向政府數向政府不知者疑有交涉其  
知者以爲趨炎附勢而已錫爵默然紹芳事繼母孫至  
孝繼母生二子紹芾紹芬小於紹芳十餘歲皆弟畜而  
師教之始終愛護無間紹芳子同德同應同德字伯念  
性和易孝友父以講幄舊勞當得廕固讓同應從弟同  
吉紹芾子也早卒無子產頗饒序應嗣其子固謝之嘗  
著庭聞小述名言十則置几案以自勵同應自存傳  
徐應聘字伯衡交河主簿一元孫十二應童子試縣令王  
用章一見歎異許以玉堂中人萬曆癸未成進士選庶

吉士授檢討在館搜討朝章典故嘗條議西北水利鑿  
鑿可見施行以察免所引實非其事家居十餘年丁未  
始起行人司副進尙寶丞庚戌陞光祿少卿寺多浮費  
一意釐飭中官關請概謝不行所省冒破以數萬計奉  
詔冊樊府事竣假歸乙卯進太僕少卿意不欲更出久  
之始赴時寺官俱缺並縮四篆閱馬措餉日無寧晷未  
四月卒於官年六十三應聘性真率事父母待弱弟以  
孝友稱人有頌其德而溢者輒泚其頽通籍三十餘年  
立朝不滿數載難進易退時論高之

諸壽賢字延之萬曆十四年進士既釋褐上疏願放歸田  
力學十年然後從政章下所司寢不奏南畿督學御史



德清人房寰連疏詆都御史海瑞同年生顧允成彭遵  
吉偕壽賢抗疏劾之言寰妬賢醜正不復知人間羞恥  
事臣等自幼讀書卽知慕瑞以爲當代偉人寰大肆貪  
汚聞瑞之風宜愧且死反敢造言逞誣臣等所爲痛心  
因劾其欺罔七罪始寰疏出朝野多切齒而政府庇之  
但疑旨誚讓及得允成等疏謂寰已切讓不當出位妄  
奏奪三人冠帶還家省愆斥歸久之起南陽教授入爲  
國子助教擢禮部主事戚畹中貴干請輒拒之邁疾請  
告歸授徒自給久之卒明史壽賢爲庶吉士邦憲孫先世  
本姓朱避國姓改諸世居邑之瀾漕壽賢六歲入小學  
卽龕宣聖像危坐對之十三能文章爲教授勸學興禮

務躬行爲諸生先在儀曹教習駙馬都尉許號忠勤有  
體時趙志皋在政府與兵部尙書石星皆唯阿充位壽  
賢劾奏之移書王錫爵論册立東宮事尤剴切旣見時  
事日非移疾歸訓誨後學多所成就蔡懋德俞琬綸朱  
大典王騰程皆其弟子也性簡淡而於地方利弊民間  
枉滯知無不言郡縣大夫重其名德咸敬信之晚年築  
室寶華山中纂周易疾作絕筆於蹇年七十有一赴哭  
會弔者至數千人崇禎初贈尙寶司丞

王臨亨字止之光州守三錫孫萬厯己丑進士授浙江西  
安知縣邑多盜民畏叛誣不敢捕臨亨第躡尋根株凡  
指爲同黨者概不問民始敢捕盜盜日以稀江山民鄭



王兩人醉毆於山趾七日王死兩膊皆傷臨亨承檄往  
訊辨其腎中石非石中腎鄭得未滅以海上多警調知  
海鹽至則急繕城垣嘗躬行版鋪役夫誤觸其冠顧勞  
以錢曰若真力作者役人皆奮邑有結黨稱十龍者橫  
甚廉得其殺人狀相繼笞死豪強屏息有盜伍一定里  
人殺之誣其夙憾一定者臨亨曰憾細何至是窮之得  
下手者鄉民王倍殺其牧兒兒父受賄云失牛自縊臨  
亨曰兒幼何知縊乎必倍殺之倍乃服一少年求某甲  
女不得誣以娶而更嫁婚書媒妁悉具臨亨呼女前與  
語良久遽詰少年而妻有痣在手左乎右乎少年愕然  
無以應有富孀被盜誣其叔之壻自屋而下以所遺屨

爲證臨亨曰壻而盜何必登屋茲方六月何用屨誣者  
服遷刑部主事卹刑廣東破格平反至二百餘人高涼  
有盜珠者中官坐湛江等六十人俱論死巡按御史不  
能救以屬臨亨臨亨念激之則相持益堅乃故爲好言  
動之中官唯唯六十人俱減死是歲遷員外郎再遷雲  
南司郎中掌都下獄緹騎羅織人爲盜希功賞臨亨得  
其情必反之京師爲之語曰遇蘇人則生謂臨亨與同  
舍郎嚴激也出爲杭州知府便道歸疾作自草墓志談  
笑而逝年四十八臨亨內行修整平居恂恂言不出口  
至爲吏聽斷甚敏西安人稱曰王一時海鹽人稱曰王  
一升謂斷事不淹宿民不費斗粟也兩邑並祠名宦子



三志堅志長志慶鄉人稱爲一鳳三雛云

顧起元字隣初父國輔字惟德以南京金吾衛籍登萬曆二年進士由刑部郎累官浙江副使多惠政起元以江寧籍舉萬曆丁酉鄉薦明年會試第一殿試及第第三人歷官國子監祭酒擢吏部左侍郎當軸欲引入政府起元避居遜園七徵不起友人題其居曰七召亭起元學問賅博凡古今成敗人物賢否諸曹掌故無不通曉居家絕迹公府惟地方利弊不卹身任而力爭之卒謚文莊原志誤以同榜三甲之嘉定顧起元復姓歸作歸起元入選舉按國子監進士題名碑戊戌一甲三人顧起元注江寧籍崑山人又邑中狀元坊背面鐫其名注萬曆戊戌一甲三人及第故依通志增入列傳杜桐字來儀崑山人徙延安衛萬曆初由世蔭累官清水

營守備以謀勇著遷延綏八衛遊擊將軍改古北口參將用總督梁夢龍薦擢延綏副總兵十四年就拜都督僉事充總兵官時卜失兔以都督同知爲套中主威令不行其下各雄長志常叵測朔漠素無痘症自嘉靖庚戌深入石州染此症犯者輒死打兒漢者卜失兔祖吉能部落也數將命奉貢累官指揮同知一日互市還與其儕透退台吉等俱染痘死透退子阿計疑邊吏酖其父思亂及卜失兔西助火落赤共擾河西諸部遂蠢動十九年冬打兒漢子土昧與他部明安互市訖復臨邊要賞聲犯內地桐與巡撫賈仁元計先出兵襲之乃令參將張剛自神木遊擊李紹祖自孤山桐率輕騎自榆



林三道並出遇寇力戰大破之斬首四百七十餘級載  
明安而還延綏自吉能納款塞上息肩二十年自此兵  
端復開明安子罷言太日思報復寇抄無已時矣桐先  
被劾罷以是役功超授右都督僉書後府二十一年以  
總兵官鎮保定二十四年徙延綏明年再徙鎮寧夏著  
力免宰僧入犯逆戰水塘溝俘斬百二十寇益糾諸部  
連犯平虜興武桐督諸將馬孔英鄧鳳蕭如蕙等連破  
之斬首二百餘級而延綏將士亦數搗巢諸部長懼乞  
款詞甚哀三十年二鎮撫臣孫維城黃嘉善協謀撫之  
乃復貢市論功文臣自內閣以下悉進官桐以先去職  
但賚銀幣許復用而已久之卒於家桐自偏裨至大將

積首功一千八百時服其勇

明史

桐五世祖官興洪武時

議簡民間三丁之一備邊制先吳之崑邑始挈一子觀  
如觀寶赴延觀寶生公器補增廣弟子員以觀如無嗣  
奪業應役生子璟璟生子四漢洋淳澹漢字本清卽桐  
父也以桐兄弟貴贈三代如其官桐生而頎偉善騎射  
其守古北口會潮河川水湍急夏秋行旅斷絕總督梁  
夢龍鎮帥戚繼光命桐董橋工時敵寇東陞諸將往援  
桐以孤軍壁其西敵不敢近橋遂成鎮延綏時御史閱  
邊上功狀以桐爲諸邊最弟松子文煥  
杜松字來青有膽智勇健絕倫由舍人從軍累功爲寧夏  
守備萬曆二十二年卜失免掠張春井大入下馬關松



借遊擊史見李經以二千餘騎邀擊馬蓮井小勝誤入  
伏中見戰死松經皆重傷士卒死過半麻貴援軍至松  
復裹創力戰寇始敗走時松已進遊擊將軍論功遷延  
綏參將貴大舉搗巢松以右軍出清平塞多所斬獲進  
副總兵尋以本官改寧夏東路松爲將廉尚氣不能容  
物常因小忿薙髮爲僧部議聽其歸尋起孤山副總兵  
二十三年擢署都督僉事代李如樟鎮延綏明年套寇  
犯安邊懷遠松大破之改鎮薊州三十六年夏代李成  
梁鎮遼東平二月敗敵連山驛賴暈歹者朶顏長昂子  
也狡黠爲邊患與從父蟒金潛入薊鎮河流口大掠去  
復結黃台吉謀犯喜峯口松受總督王象乾指潛搗黃

台吉帳以牽薊寇乃從寧遠中左所夜馳至哈流兔掩  
殺拱兔部落百四十餘級以大捷聞邀重賞副使馬拯  
謂拱兔內屬不當剿彼且復讎與松相訐松忿邀賞愈  
急詔予之拱兔果以無罪見剿怒小歹青又數激之乃  
以五千騎攻陷大勝堡執守將耿尙忠支解之深入小  
凌河肆焚掠遊擊千守志遇於山口大敗死千餘人守  
志亦重創松駐大凌河不敢救遼人多咎松朝議謂松  
前僅抵錦州邊十里未嘗出塞所殺乃保塞部落悉縛  
殺之非陣斬松愈忿言撫按諸臣附會馬拯害其奇功  
自提兵出塞將搗巢以雪前耻而所得止五級士馬多  
陷大凌河松益慚忿數欲自縊盡焚其鎧冑器仗置一



切疆事弗問兵部以聞乃勒松歸里而以王威代之松  
既廢時多惜其勇然惡其僨事無推轂之者至四十三  
年河套寇大入令松以輕騎搗火落赤營獲首功二百  
有奇復叙用逾二年薊邊多事特設總兵官鎮山海關  
以松任之四十六年張承蔭戰歿詔松馳援遼陽明年  
二月楊鎬議四路出師以撫順最衝令松以六萬兵當  
之故總兵趙夢麟保定總兵王宣爲佐期三月二日抵  
二道關會李如柏等並進二十九日夜出撫順關日馳  
百餘里抵渾河半渡河流急不能盡渡松醉趣之將士  
多溺河中松遂以前鋒進連克二小砦松喜三月朔乘  
勢趨撒爾湖谷口時 大清方築城界凡山上役夫萬

五千以精騎四百護之聞松軍至精騎則盡伏谷口以  
待松軍過將半伏兵尾擊之退至界凡渡口與築城夫  
合據山旁吉林崖明日松引大軍圍崖別遣將營撒爾  
湖山上松軍攻崖方戰 大軍益千人助之已又續遣  
二旗兵趨界凡以爲援而遣六旗兵攻松別將於撒爾  
湖山明日六旗兵大戰破撒爾湖山軍死者相枕藉所  
遣助吉林崖者自山馳下擊松軍二旗兵亦直前來擊  
松兵大敗松與夢麟宣皆歿於陣橫屍亘山野流血成  
渠 大清兵逐北二十里至勾琴山而還時軍營五百  
尙阻渾河而松已敗頃之馬林劉綎兩軍亦敗獨李如  
柏一軍遁還事聞朝議多咎松輕進天啓初贈少保左



都督世廕千戶立祠賜祭明史松先諡武莊 國朝追諡

忠烈

葛錫璠字魯生先世自勾曲遷邑之兵墟錫璠爲兩浙運使綸從孫年十九舉於鄉萬曆辛丑成進士授刑部主事遷員外郎有大司馬私人受戎帥賄事露屬刑部曲庇之錫璠執不可卒按以法出知兗州府甫下車歲旱民饑力請賑濟躬歷二十七城全活甚眾諸生之貧倉穀者二百餘家歲荒無以償爲設法代補凡五百餘石魯邸在兗州縣徵解藩祿不時貧宗坐困錫璠嚴爲立限按期給之其宗人之撓法者督治不少貸擢河南按察副使福王定封雒陽朝議皆願王早就國而時方營

藩府錫璠董其役晝夜經營刻期而就及王之國貂璫塞路從者多擾民錫璠答其尤者一二人乃不敢動有詔賜福邸莊田十萬畝必取稅之不入者合三省給之奸民借讎家田投牒縣官錫璠曰此奸民也立寘諸法靈寶盜聚黨千人將爲亂密授方畧殲其渠魁餘黨散走進山東兗西道參政未行陞河南按察使聞父病亟請終養歸卒錫璠性恬潔里居後璠燄方張同門生呂純如故黨閹邀令共事不答純如怫然去遂終其世弗與通居家勤約自持門庭肅然邑中言家法者必推葛氏南都建贈太常寺卿子八人鼎鼐鼎鼐燁黜鏘鏘張魯唯字宗曉憲臣孫父志美字濟卿本庶子少壓於嫡



不得與嫡子志熙齒而能自樹立爲諸生輒高等及志熙沒撫其孤如己子卒祀鄉賢魯唯登萬曆癸丑進士授刑部主事卹刑河南多所平反遷員外郎出知紹興府爲政平易近人民間有所陳白卽以寸楮付其人或請遣役曰吏下村落狼入羊羣也絕不許兩造至庭和顏諭解不煩敲扑訟者多感泣俗習溺女設義產育之越三載投劾歸天啓癸亥以冢宰趙南星薦起副使分守寧紹轉河南參政督直省漕運時海內多故軍興旁午需東南漕輓甚亟前使者或優容運弁載他貨物舟益濡滯不能以時至魯唯燭其奸弊悉心釐剔以母憂歸軍民肖像立祠瓜步服闋遷浙江左布政改福建致

仕卒年五十七子三立平立廉立善

蔡懋德字維立少慕王守仁爲人著管見宗良知之說舉萬曆四十七年進士授杭州推官天啓間行取入都同鄉顧秉謙柄國懋德不與通秉謙怒以故不得顯擢授禮部儀制主事進祠祭員外郎尙書率諸司往謁魏忠賢祠懋德託疾不赴崇禎初出爲江西提學副使好以守仁拔本塞源論教諸生遷浙江右參政分守嘉興湖州劇盜屠阿丑有衆千餘出沒太湖懋德曰此可計擒也悉召瀕河豪家把其罪簡壯士與同發遂擒阿丑皆曰懋德知兵內艱服除起井陘兵備歲旱懋德禱卽雨他鄉爭迎以禱又輒兩調寧遠以守松山及修臺堡功



數叙賚會災異求言懋德上省過治平二疏規切君相  
一時咸笑爲迂楊嗣昌謂其清修弱質不宜處邊地改  
濟南道濟南新殘破大吏多缺人懋德攝兩司及三道  
印遷山東按察使河南右布政使田荒穀貴民苦催科  
賊復以先服不輸租相煽誘懋德亟檄州縣停徵上疏  
自劾詔鑄七級視事十四年冬擢右僉都御史巡撫山  
西召對賜酒饌銀幣明年春抵任討平大盜王冕十月  
統兵入衛京師詔扼守龍泉固關二關李自成已陷河  
南懋德禦之河上十六年冬自成破潼關據西安盡有  
三秦十二月懋德師次平陽遣副將陳尙智扼守河津  
山西京師右背蒲州北抵保德悉鄰賊依黃河爲險然

窮冬冰合賊騎得長驅懋德連章告急請禁旅及保定  
宣府大同兵疾赴河干合拒中朝益積憂山西言防河  
者甚眾然無兵可援懋德以疲卒三千當百萬狂寇時  
太原洶洶晉王手教趣懋德還省十八日懋德去平陽  
二十日賊抵河津自船窩東渡尙智走還平陽二十三  
日賊攻平陽拔之尙智奔入泥源山中二十八日懋德  
還太原明年正月自成稱王於西安賊旣渡河轉掠河  
東列城皆陷於是山西巡按御史汪宗友上言曰晉河  
二千里平陽居其半撫臣懋德不待春融冰泮遽爾返  
旆賊卽於明日報渡臣言宜提一旅星馳而前張疑聲  
討尙冀桑榆之收無如不聽何賊日遣僞官而月餘郡



皆失是誰之過歟有詔奪官候勘以郭景昌代之二十三日尙智叛降於賊於是懋德誓師於太原布政使趙建極監司毛文炳藺剛中畢拱辰太原知府孫康周署陽曲事長史范志泰等官吏軍民咸在懋德哭衆皆哭罷官命適至或請出城候代懋德不可曰吾已辦一死矣景昌卽至吾亦與俱死調陽和兵三千協守東門剛中慮其內應移之南關之外遣部將張雄分守新南門召中軍副總兵應時盛入參謀議懋德等登城二月五日賊至城下遣部將牛勇朱孔訓王永魁出戰死之明日自成具鹵簿督衆攻城陽和兵叛降賊又明日晝晦懋德草遺表須臾大風起拔木揚沙調張雄守大南門

雄已縋城出降語其黨曰城東南角樓火器火藥皆在我下卽焚樓夜中火起風轉烈守者皆散賊登城懋德北面再拜出遺表付友人賈士璋間道達京師語人曰吾學道有年已勘了生死今日吾致命時也卽自剄麾下持之時盛請下城巷戰顧懋德曰上馬懋德上馬時盛持矛突殺賊數十人至炭市口賊騎充斥時盛呼曰出西門懋德遽下馬曰吾當死封疆諸君自去衆復擁懋德上馬至水西門懋德叱曰諸君欲陷吾不忠耶復下馬據地坐時盛已出城殺妻子還顧不見復斫門入語懋德曰請與公俱死遂偕至三立祠懋德就縊未絕時盛釋甲加其肩乃絕時盛取弓絃自經自懋德而下



太原死事凡四十有六人賊皆尸之城上自成恨懋德之不降也驗其尸以刃斷頸而去福王時以懋德不守河爲失策乃謚忠襄賜祭葬而不予贈廕餘賜卹有差明懋德曾祖安以子疇出繼於姑冒陳姓疇子允忠允忠生懋德懋德官浙西參政始奏復本姓方七歲時讀大學便立志學爲聖賢後從學諸壽賢益以遠大相期許在杭州立讞盜讞命清獄法兼修紫陽社倉陽明保約陞主事以封差告歸築室奉母題所居曰不隨室以見志崇禎初疏陳三吳水利劉河當濬狀提學江西嘗登白鹿洞講孝經大義聽者感動又作文心八則以正文體參藩浙江時屠阿丑爲患撫按議合南省兵會剿

懋德以兵聲先聞丑颺而入海與海寇劉香合爲害叵測因密致湖濱巨室之窩盜者脅以利害曰汝能爲我用當賞汝死然不責汝鈎捕但我遣人至鄉者汝密留勿洩窩主悉叩頭願効命乃召部將授以方畧偵賊所在散健卒爲商賈匠工星卜先後至其地窩主飲食之約日齊發擒其最驍悍之賊目沈千斤丑奪氣遁有部卒僞爲田夫值於隘道猝抱持之陷泥淖中追者至就縛撫其餘黨盜平督撫上其功於是廷臣交章列薦懋德又以浙盜之橫起於捕盜者誨盜至於借盜殃民民益迫附盜乃立捕盜法捕不敢爲奸嚴保甲重窩盜之罰自是盜無所容自井陘調寧前屬諸子於家老曰吾



直隸州志卷二十四  
不復問矣寧前孤懸關外勢甚危懋德日夕訓勵將士  
識應時盛於偏裨中時遼餉皆待發京帑恒阻梗懋德  
示恩信貸諸大商如期償之屢貸以濟故未嘗以餉絕  
致變祖大壽久鎮邊得士卒心士頗驕橫懋德徐謂大  
壽曰邊事急幸將軍努力敢相厄哉然部下士魚肉商  
民將軍不知也某請爲將軍治之亦以全將軍令名保  
始終耳大壽悅爲嚴戒士卒且遣二子受業內監高起  
潛同鎮遼以制府自居懋德貽書云職與貴監相見之  
禮會典不載然軒輊當從義起貴監稍軒爲傲德稍輊  
則受謙名職等稍輊屬屈節稍軒則不失正氣今使職  
等惟明命是尊而貴監常以親近士君子爲榮歡然通

賓主之意豈不兩相成哉起潛無以難久之亦敬信事  
必咨而後行時山東河南北直失陷名城數十懋德不  
解甲於松山者四十七日於寧遠九日他攻圍一二日  
者不數計而八城迄無恙兵部奏守城功第一將大用  
閣部貽書問所欲竟不報於是敘功覆奏自督撫至小  
吏皆進爵廕子獨謂懋德弱質不勝任調腹裏用壬午  
春懋德至山西嘗榜於門曰願聞已過求通民情於三  
立祠爲講會聘名儒傅山主之又立干城社招奇謀義  
勇之士其自率千人赴太原時寧武鎮周遇吉以餉缺  
不赴調懋德遣使與言曰公之忠義必不鼠竄偷生倘  
逆賊長驅北上願與公約公死守寧武以扼其北僕死



守太原以障其東賊畏我二鎮躡其後或可牽制以俟  
畿輔援師大集遇吉慨然許諾厥後寧武城陷遇吉死  
之卒如所約賊自渡河入晉所攻而破者惟太原寧武  
兩城餘皆望風迎降甲申正月晦賊遊騎至郊持牌招  
諭懋德登陴斬來使懸其頭於堞城中守志益堅二月  
五日攻圍四集乃遣壯士發所伏地雷殺賊無算既自  
縊自成刃其首投水溝段可達求而得之傳其屍殮於  
泰山廟瘞南門外東岡越五年戊子子方燿等扶櫬歸  
葬於郡之西山懋德留心人才人有一能必籍記之故  
遷調識拔無不盡其才卒以時勢牽掣至不可為  
按公陽時按臣汪文友以書趣公歸衛晉王王亦絡繹遣使請救公不得已返太原賊既渡河文友以促公歸故懼

得罪乃劾公以自解云

生平與陳龍正交最善懋德有幼女未字

山西將陷龍正在京師以書問訊云吾知公必死欲得  
忠臣女為孫婦懋德許之而龍正亦於乙酉夏不食八  
日死懋德長子方燿字涵之痛父殉流賊之難絕意仕  
進隱居以老雖屢空不肯干人卒日貧無以殮次子方  
炳別有傳 國朝乾隆四十一年追諡懋德忠恪

陳其柱字元素時孫幼就童子試為邑令樊玉衝器賞萬  
歷癸丑成進士授慈谿知縣俗故健訟每以溫言解之  
邑多豪紳以禮屈服府差必由縣票方准入鄉否則繩  
以法六年再舉卓異入為兵部主事去任日萬民哭送  
至車不得前後祀之名宦天啟丙寅遷武選司郎中時



魏忠賢弟姪冒濫勲蔭其黨尙書王永光主之輒下司擬行其柱執會典抗不應會昌平鎮兵譁圍困餉司出其柱爲昌平道刻期趣行其柱單騎抵任擒渠魁而寬其脅從變遂定地近居庸爲築城堡綏降卒邊境得靖丁卯大吏建祠媚璫率屬羅拜其柱獨稱疾不往闔黨御史倪文煥爲其柱同年生承忠賢指餌之懾之不爲動未幾璫敗督理陵工事竣遷山西參政與督臣閻鳴泰議不合拂衣歸里居數載杜門卻掃邑令葉培怨慕其名因徽商構訟欲得其柱緩頰其人以千金至其柱堅拒之令慚謝撫臣薦起已病卒年五十六子用岳諸生用牧自有傳

顧錫疇字九疇年十三以諸生試南京魏國公以女女之弟萬厯四十七年進士改庶吉士授檢討天啟四年魏忠賢勢大熾錫疇偕給事中董承業典試福建程策大有譏刺忠賢黨遂指爲東林兩人並降調己更削籍崇禎初召復故官厯遷國子祭酒疏請復積分法禮官格不行錫疇復申言之且請擇監生爲州縣長已請正從祀位次進士爲國子博士者得與考選帝並允行省親歸乞在籍終養母服除起少詹事進詹事拜禮部左侍郎署部事帝嘗召對問理財用人錫疇退列陳用人五失曰銓敘無法文網太峻議論太多資格太拘鼓舞未至請先令用人之地一清其源精心鑒別隨才器使一



善也赦小過而不終廢棄二善也省議論而專責成三善也拔異才而不拘常格四善也急獎勵而寬督責五善也末極陳耗財之弊仍歸本於用人帝善其奏楊嗣昌請撫流寇有樂天者保天下及善戰服上刑語錫疇抗言此諸侯交鄰事稱引不倫與嗣昌大忤嗣昌秉政諸詞臣多攻之嗣昌頗疑錫疇會駙馬都尉王昺有罪錫疇擬輕典嗣昌搆之遂削其籍十五年廷臣交薦召還御史曹溶給事中黃雲師復言其不當用帝不聽起爲南京禮部左侍郎福王立進本部尙書時尊福恭王爲恭皇帝將議廟祀錫疇請別立專廟俄請補建文帝廟諡景皇帝廟號及建文朝忠臣贈諡並從之東平伯

劉澤清言宋高宗卽位南京卽以靖康二年五月爲建炎元年從民望也乞以今歲五月爲宏光元年錫疇言明詔已頒不可追改乃已時定大行皇帝廟號爲思宗忻城伯趙之龍言思非美稱援証甚核錫疇亦以爲然疏請改定大學士高宏圖以前議自己出力持之遂寢溫體仁之卒也特諡文忠而文震孟羅喻義姚希孟呂維祺皆不獲諡錫疇言體仁得君行政最專且久其負先帝罪大且深乞將文忠之諡或削或改而補諡震孟諸臣庶天下有所勸懲報可遂諡諸人削體仁諡吏部尙書張慎言去位代者徐石麒未至命錫疇攝之時馬士英當國錫疇雅不與合給事中章正宸熊汝霖劾之



遂乞祭南海去明年春御史張孫振力頌體仁功請復  
故謚遂勒錫疇致仕南都失守錫疇鄉邑亦破時方遭  
父喪間關赴閩唐王命以故官力辭不拜寓居温州江  
心寺總兵賀君堯撻辱諸生錫疇將論劾君堯夜使人  
殺之投尸於江溫人覓之三日乃得棺殮明史錫疇自少  
有神童之目申時行器之字以長孫女旋殤典福建試  
以無父無君命題發策首以人之貴賤爲問而謂色授  
氣使者爲甚賤不可昵及爲程策又曰朱紫雜沓於貂  
璫金組艷奕於婦寺會內閣魏廣微以請託不行願秉  
謙以聯宗不應傅成罪狀削籍崇禎初起陞贊善歷諭  
德遷祭酒正從祀有從祀議請養歸於山之東麓築樂

彼之園娛侍者六年就家遷少詹未任遷詹事父天敘  
促令入都陞見上練兵一疏上眷遇殷渥擢禮部左侍  
郎楊嗣昌以母服奪情入相何楷黃道周等連疏攻之  
平臺召對廷臣爭持正論錫疇班最上實倡之嗣昌遂  
以駙馬王昺蠲助不及額部從輕議爲錫疇罪革職歸  
越三年起補南京至鎮江而京師陷聞任尙書時請贈  
謚建文朝方孝孺等正德朝蔣欽等忤闖諸臣左光斗  
等殉難諸臣范景文等諸生許琰布衣湯文瓊等乞祭  
南海歸天叙卒承遺命赴閩歿後溫人勒碑文信國祠  
國朝乾隆四十一年追謚節愍子鑿字諱明以廕官

海南副使



葉重華字德元盛六世孫崇禎戊辰進士授工部主事歷  
禮部郎中出爲浙江參議分巡嘉湖改河南分守雖陳  
遷山東副使分巡濟寧時羣盜張文宇劉顯等作亂合  
城鼎沸謂諸紳士皆通賊重華開誠布公結納紳士申  
嚴保甲請於巡撫發兵會剿一鼓殲之歲大饑請於總  
河張國維發萬金市麥以賑活十餘萬人流寇李青山  
劫奪漕艘山左震動重華佐國維討之擒馘千人轉廣  
東參政分巡惠潮值姜世英寇潮重華躬督守禦不避  
矢石賊圍攻浹旬忽解去重華曰此懈我也備益嚴夜  
半賊果以民家採橄欖高梯傅城上重華遣將士發巨  
礮擊之賊始遁去已而會兩省兵搗其巢世英就縛賄

權要冀以降人例得官重華持不可中夜屏人奏記制  
府詰且設備引之入見併其黨姜大頭等驅出斬之市  
人懼怖嚮其肉立盡方世英未擒時有裒匿名帖於甌  
投署中云某某將爲亂重華使人廉之則某某皆富民  
因取帖投之火置不問陞廣西按察使未赴轉太常寺  
少卿謝歸不復出卒年六十九子五方升方至方恒方  
藹方蔚

朱天麟字游初崇禎元年成進士授饒州推官有惠政考  
選入都貧不能行賂擬授部曹帝御經筵講官並爲稱  
屈及臨軒親試乃改翰林編修十七年正月奉命祭淮  
王抵山東而京師陷及南都破走福州唐王擢少詹事



署國子監事天麟見鄭芝龍跋扈乞假至廣東聞汀州  
變又走廣西入安平土州順治四年永明王居武岡以  
禮部侍郎召天麟疏請王自將倡率諸鎮毋坐失事機  
辭不至明年王在南寧擢禮部尚書尋拜東閣大學士  
天麟請親率土兵畧江右不聽乃趨謁王會李成棟反  
大清從王至潯州而潯帥陳邦傳請世居廣西如黔  
國公故事天麟執不允邦傳怒以慶國公印尙方劍擲  
天麟舟中要必得仍執不允已而成棟奉王駐肇慶天  
麟謂事機可乘復勸王亟頒親征詔規取中原王優詔  
答之當是時羣臣各樹黨從成棟至者曹睭耿獻忠洪  
天擢潘曾緯毛毓祥李綺自誇反正功氣凌朝士從廣

西扈行至者天麟及嚴起恒王化澄晏清吳貞毓吳其  
雷洪士彭雷德復尹三聘許兆進張孝起自恃舊臣詆  
曹耿等嘗事異姓久之復分吳楚兩黨主吳者天麟孝  
起貞毓李用楫堵允錫王化澄萬翔程源郭之奇皆內  
結馬吉翔外結陳邦傳主楚者袁彭年丁時魁蒙正發  
劉湘容金堡皆外結瞿式耜內結李元允元允者惠國  
公李成棟子爲錦衣指揮使進封南陽伯握大權彭年  
倚爲心腹勢張甚彭年嘗論事王前語不遜王責以君  
臣之義彭年勃然曰倘向者惠國以五千鐵騎鼓行而  
西君臣義安在王變色大惡之彭年等謀攻去吉翔邦  
傳權可獨擅也而堡居言路有鋒氣乃疏陳八事劾慶



國公邦傳十可斬文安侯吉翔司禮中官龐天壽大學士起恒化澄與焉起恒化澄乞去天麟奏留之堡與給事中時魁等復相繼劾起恒吉翔天壽無已太后召天麟面諭武岡危難賴吉翔左右令擬諭嚴責堡等天麟爲兩解卒未嘗罪言者而彭年輩怒不止王知羣臣水火甚令盟於太廟然黨益固不能解明年春邦傳許堡官臨清嘗降流賊受其職且請堡爲已監軍天麟因擬諭譏堡堡大憤時魁乃鼓言官十六人詣閣詆天麟至登殿陛大譁棄冠擲印而出王方坐後殿與侍臣論事大驚兩手交戰茶傾於衣急取還天麟所擬而罷天麟遂辭位王慰留再三不可陛辭叩頭泣王亦泣曰卿去

余益孤矣初時魁等謂所擬出起恒意欲入署毆之是日起恒不入而天麟獨自承遂移怒天麟逐之去天麟移居慶遠化澄貪鄙無物望亦爲時魁等所攻碎冠服辭去王乃召何吾騶黃士俊入輔未幾吾騶亦爲堡等排去獨士俊起恒在乃復召天麟天麟不至堡等旣連逐三相益橫每闌入閣中授閣臣以意指王不得已建文華殿於正殿旁令閣臣侍坐擬旨以避之堡又連劾堵允錫及侍郎萬翔程源郭之奇尙書吳貞毓貞毓等欲排去之畏元允爲援不敢發七年春王赴梧州元允留肇慶陳邦傳適遣兵入衛貞毓之奇翔源乃合諸給事御史劾彭年湘客時魁堡正發把持朝政罔上行私



貴州兩縣續修志 卷二十四  
罪王謂彭年反正有功免議下堡等獄堡又以語觸忌  
與時魁並謫戍湘客正發贖配追贓王乃再召天麟天  
麟疏言年來百爾構爭盡壞實事昔宋高宗航海猶有  
退步今則何地可退當奮然自將文武諸臣盡擐甲胄  
臣亦抽峒丁擇土豪募水手經畧嶺北湖南爲六軍倡  
若徒責票擬以爲主持政本今政本安在乎時 大兵  
益逼孫可望請王赴雲南初起恒持可望封天麟及澄  
獨謂宜許及可望使至力請從之諸臣以起恒被殺故  
皆不可天麟乃奉命經畧左右兩江土司以爲勤王之  
助兵未集 大兵逼南寧王倉皇出走天麟扶病從之  
明年四月抵廣南王已先駐安龍天麟病劇不能入觀

卒於西坂村

明史

天麟先世居吳江爲農家天麟幼好讀

無力從師十歲從父子靜之黎里道士陸華陽者故崑  
人欲留之讀書父不可攜歸越二日天麟潛附鬻薪舟  
往家人促之不肯歸華陽亦勸學甚力延名師教之八  
年而學成因華陽壻於崑山沈氏冒其姓曰沈天英奉  
其父并挈從弟天鳳天虬占籍崑山天麟由諸生中萬  
歷戊午鄉試嗣請復本姓改名天麟南都破天麟方家  
居邑人謀固守天麟與徐開禧並率鄉勇防守信義  
大兵至遂挈家航海至閩旣卒粵西永明贈少保建極  
殿大學士諡文靖子宿垣字日生初授大理評寺遷御  
史先卒斗垣字月生授行人奉命冊鞏昌王白文選行



至板橋孫可望部下張勝犯蹕抗節死贈兵科給事中  
天鳳字來丹子翼垣字元生天麟入閩時翼垣隨天鳳  
偕往天鳳領閩省鄉薦官儀曹尋入粵翼垣佐天麟司  
筆札壬辰天麟卒未幾天鳳卒於江州翼垣卽卜地以  
葬服闋以明經考授詹事府錄事至壬寅四月奉天麟  
柩歸葬天麟妻沈以翼垣貧乏析遺產相勞力辭不受  
就幕自給卒於鳩茲

杜文煥字弼武由廕敘歷延綏遊擊將軍累進參將副總  
兵萬曆四十三年擢署都督僉事寧夏總兵官延綏被  
寇文煥赴救大破之明年遂代官秉忠鎮延綏屢敗寇  
安邊保寧長樂斬首三百有奇西部火落赤卜言太懼

相率降沙計數盜邊爲文煥所敗遂納款旣而復與吉  
能明愛合駐高家柏林邊要封王補賞十事文煥襲其  
營斬首百五十火落赤諸部落攢刀立誓獻罰九九九  
九者部落中罰駝馬牛羊數也已沙計又伏兵沙溝誘  
殺都指揮王國安糾猛克什力犯雙山堡復犯波羅文  
煥擊破之追奔二十餘里當是時套寇號十萬然其眾  
分四十二枝多者二三千少不及千騎屢不得志沙計  
乃與吉能明愛猛克什力相繼納款延綏遂少事文煥  
尋以疾歸天啟元年再鎮延綏詔文煥援遼文煥乃遣  
兵出河套搗巢以致寇諸部大恨深八固原慶陽圍延  
安揚言必縛文煥掠十餘日始去命解職候勘奢崇明



圍成都總督張我續請令文煥赴救至則圍已解借諸軍復重慶崇明遁永寧文煥頓不進尋擢總理盡統川貴湖廣軍度不能制賊謝病去坐延綏失事罪戍邊七年起鎮寧夏寧錦告警詔文煥馳援俄令分鎮寧遠進右都督調守關門尋引疾去崇禎元年錄重慶功蔭指揮僉事三年陝西羣盜起五鎮總兵並以勤王行總督楊鶴請令文煥署延鎮事兼督固原軍數敗賊賊亦日益多會山西總兵王國樑擊王嘉允於河曲大敗賊入據其城部議設一大將兼統山陝軍協討乃令文煥爲提督偕曹文詔馳至河曲絕餉道以困之神一元陷寧塞文煥家破遂留文詔令文煥西還四年御史吳牲劾

其殺延川難民冒功給事中張承詔復劾之下獄禡職十五年用總督楊文岳薦以故官討賊無功復謝病歸子宏域天啟初歷延綏副總兵七年夏文煥援遼卽擢總兵官代鎮寧夏積資至右都督崇禎中提督池河浦口二營練兵遏賊南渡頗有功十三年移鎮浙江尋謝病去國變後文煥父子歸原籍崑山卒明史文煥爲桐長子年十三承指揮使垂髻披金紫隨父登朝見者偉之善騎射精兵法兼通左氏春秋旁及諸子百家尤工六朝初唐諸體年十九從季父松征朔方大捷代草露布倚馬立成庚午冬延綏飢民作亂詔起文煥剿撫諭降賊首王之爵等七百人副賊首苗美潛伏小滴流山再



破之追至安塞縣之鐵葉塞賊黨以美首獻延東黃甫  
川賊王嘉允齊三等以延撫標下副將李釗求貨於賊  
怒而襲破清水木瓜三堡總制洪承疇以鎮西將軍印  
授文煥往討文煥先擊齊三以斷嘉允聲援陣於三神  
堂佯退誘之大破賊賊約嘉允同送款文煥不許勒兵  
陣斬嘉允等露布入告時天旱民饑賊大起米脂賊張  
獻忠據十八寨乞降文煥陽許之尋討清澗保安安寨  
諸賊俘斬八百人而府谷餘孽王家用等復起陷河曲  
文煥與曹文詔馳至河曲家用阻險堅守天寒大雨雪  
本兵梁廷棟督戰文煥曰如此吾士卒必傷絕其糧春  
至鼓而下之百全之道也會寧塞飢軍神一元攻陷延

西新安寧塞柳樹澗三堡塞塞爲文煥居里宗人多死  
乃留文詔圍河曲移師西救一元時棄寧塞陷保安旣  
又據合水圍慶陽文煥與戰慶陽城下斬馘甚多賊僞  
降總兵楊某信之安插寧塞令無許妄殺一賊文煥歎  
曰借名城爲盜資危矣乃以其族行未幾被劾歸旣歸  
杜門不與外事客至焚香啜茗彈碁鼓琴口不言功卒  
年七十

國朝

○徐元文字公肅明太僕卿應聘曾孫自少端重不苟言  
笑與兄乾學秉義爲古學相切劘順治十六年一甲第  
一名及第授修撰數召見便殿十八年江南奏銷案



起坐呈誤謫鑿儀衛經歷事白復原官乞假歸丁父艱  
嘗迎其從父開遠喪於汀州靖南王耿繼茂與子精忠  
邀元文往謁願以二千金爲贖元文拒不往康熙八年  
服闋補國史院修撰進秘書院侍讀典陝西試遷國子  
監祭酒充經筵講官以養上莫大於太學請準順治間  
例直省選拔副榜並送監肄業且請廣鄉試之額停輸  
納之例多採納施行又請官學生與廕監分缺並用俾  
官貧生不致淹滯在監四年與人材崇教化  
上嘗語閣臣徐元文爲祭酒規條嚴肅滿洲子弟有不率  
教必加撻責至今畏之後來安得及此十一年奉旨  
教習庶吉士明年進內閣學士充

太宗實錄副總裁逾年改翰林掌院學士充丙辰 殿試  
讀卷官總裁孝經衍義主武會試丁內艱歸十八年九  
月服方禫 特召監修明史入都疏辭 優詔不許請  
徵遺獻舉興化李清餘姚黃宗羲嘉興曹溶江都汪懋  
麟溫陵黃虞稷慈谿姜宸英鄞縣萬言等部議不許  
上特從之清宗羲溶以老不至各上所著書時未有學士  
缺特改內閣學士項景襄於兵部而以其缺補元文元  
文在內閣遇事當言輒白輔臣

上有問必具言本末會推江西按察使御史唐朝彝持論  
異同科道公疏劾之副都御史李仙根給事李宗孔不  
署名部議革朝彝職鑄仙根宗孔五級元文奏會推本



欲公之廷論今所舉若此卽將來所舉非人誰敢駁正  
上曰善免其處分元文又言免者有罪之謂也今諸臣實  
無罪但云不必處分則所全多矣 從之御史有言宜  
遣大臣巡方者元文昌言閣中謂巡方用御史以有憲  
長彈壓若大臣妄作威福適足爲地方害乃止

上欲黜御史蔣伊呂兆熊元文曲爲保持

上曰蔣伊卿論其文呂兆熊卿又論其人二者將安定旣  
而曰從汝從汝明年超拜左都御史 賜御書清慎勤  
臨米芾董其昌書各一時滇孽將平元文疏言三叛虐  
政在粵者五日鹽埠渡稅總店市船漁課在閩者四日  
鹽稅報船冒擾驛夫牙行渡稅在滇者亦四日勲莊園

田礦廠冗兵宜通行申飭預爲禁止又言滇孽游魂旦  
夕除剪顧賊已平而不絕根株雖復銷兵勞費未已蓋  
同惡之人仍留彼土則非永久之規移調他方則多遷  
徙之費統之別將則疑情未化攝之歸旗則猝難檢制  
宜明布 恩旨悉與滇雪應補職者量予換補綠旗職  
銜願補伍者量行撥補綠旗缺伍其他一概散遣分道  
安插於事體爲便初御史劉安國請察隱占田畝部議  
凡察出者分別甄錄州縣利其陞敘多坐派捏報累民  
元文力言其弊凡欺罔害民者請加等科罪又條列督  
撫藩臬四弊一不舉其職一功過無準一察吏不嚴一  
心多僥倖尋疏劾福建總督姚啟聖欺罔數事啟聖惶



恐待罪又劾浙江副都統高國相恣欲害民并旗弁李九思毆辱學臣劉霏體統埽地得旨嚴察治罪又劾巡鹽御史闕某狗庇貪吏因請除兩淮積弊以清鹽政從之勒石永禁又以察吏當從銓敘始上言康熙十八年定例捐納授官到任三年後稱職者具奏陞轉不稱職者題參處分今稱職以捐銀而得則此曹營輸入之計勢必剝民以求稱職吏長貪冒所當亟行停止歲貢本屬正途自開捐納生員之例雖目不識丁而今日納生員明日納歲貢名則清流實爲銅臭總之捐納事例盡屬權宜臣願於滇南收復之日概行停止雲南既定疏言保泰之道條列十五事上之詞甚切直府部院

寺筆帖式三千人求開例捐納典州縣滿大臣以好言勸元文力持不可卒從其議而罷二十二年掌計典尋舉行軍政前此大計軍政直省文武大僚輒餽遺憲長至是元文榜於國門遂無敢以苞苴進者已復言滿洲漢軍官員丁父母憂宜一體守制二十七月並請申居喪釋服從吉之禁候補御史蕭鳳鳴居喪挾妓久不回旗坐革職提問在臺三年數條上便宜知無不言不畏疆禦俄坐廷推湖北按察使不當鑄三級將歸有旨留京專領史館先是議者以明祚終愍帝南渡以後皆不錄元文言福唐桂三王覆亡之迹不可不著請從宋史益衛二王西遼耶律大石之例以三王附傳至諸臣



盡忠所事者均采錄報可一統志館初開復命兼充副總裁二十七年兄乾學以左都御史遷尚書起元文代之首請嚴科道官交關督撫處分請復御史建言牌以次輪轉二十日內責令建白之制疏陳銓政壅滯請急議更定劾去兩淮巡鹽御史陶式玉請停臺灣興販薦舉故御史李時謙裘充美時謙得復用未幾遷刑部尚書甫十日改戶部銳志革除舊弊凡錢糧銷算支給一不假手胥吏又論十四司各言應行事宜務除積習又論滿漢司官同時說堂便相商榷事易以辦又奏請釐弊五事並著爲令奉差清理刑獄請以死罪減等者安插內地二十八年五月拜文華殿大學士仍兼翰

林院事明年夏兩江總督傅臘塔劾元文兄弟家人不法事元文奏辨遂力求罷以原官致仕舟過臨清權關者欲構其罪登舟大索惟圖史數千卷光祿饌金三百兩而已家居未一年卒年五十八元文前後歷官皆直講筵音吐宏暢敷陳愷切

上命儒臣分撰講章元文親爲裁定相當務之急以立言嘗具疏彙繳講義勸

上時時省覽振勵精神且言臣工講論者淺夙夜體驗爲深片言會悟者微一心運用爲大

上嘉納之立朝三十年清介剛正風裁凜然論者以爲無愧大臣云子樹聲字實均康熙甲子舉人官中書舍人



樹本別有傳

○葉方藹字子吉明吏部侍郎盛七世孫重華子年十二補諸生順治十四年領鄉薦科場議起

世祖親加覆試手定殿最初試方藹名第八十六年春再試第一秋滇南底定重舉會試中式 廷試第三人授編修

上於乾清宮側題讀書處曰孚齋惟學士王熙修撰徐元文及方藹得侍 命各爲孚齋說以進江南奏銷案起籍註欠銀一釐罷歸康熙元年春謫上林苑蕃育署丞未幾江南撫臣覆覈方藹實無欠復原官三年充會試同考官請終養五年居母憂服闋赴補病假歸十一年

補原官明年 御試翰林諸臣方藹列第一充日講起

居注官夏 賜宴瀛臺命羣臣各獻平日詩文方藹獨進八箴

上以示大學士熊賜履賜履對曰諸臣連篇累牘不如方藹片紙隻字

上然之遷司業轉侍講陞左庶子進侍講學士充孝經衍義總裁轉侍讀學士 命每日進講故事講官十餘員進講者大臣二員時澤州陳廷敬桐城張英日值

上嘗以英請假命方藹充之後遂三人同值十七年入直南書房總裁皇輿表鑑古輯覽充 經筵講官 賜御書清慎勤格物存誠字晉掌院學士教習庶吉士充己



未會試副總裁會 詔舉博學宏詞 特命校閱試卷  
與庶子張玉書俱充明史館總裁方藹尋加禮部尙書  
二十年冬以加銜授刑部右侍郎卒於官年五十四  
上聞軫卹 賜祭葬諡文敏方藹清勤謹慎自躋清要奉  
命撰進編輯文字輒稱 旨 錫賚便蕃方藹益潔  
清自矢任司業悉汰除陋規主會試及閱宏詞卷苦心  
蒐采一時館閣知名之士多出其門方藹絕不自多退  
直之暇惟與陳廷敬張英及新城王士正輩稽古論文  
丹黃鉛槧而外一無所問二十一年四月會推湖廣按  
察使方藹昌言曰知人固難若參政中盡無可用則終  
於禁錮副使中又無確知則徒屬揣摩朝廷以用人責

之會推今後諸公宜留意人材矣語未竟疾作蔚州魏  
象樞同邑徐秉義送之歸寓見臥榻用板扉布帳多補  
綴爲歎息泣下子淳字淵發康熙戊辰進士官翰林院  
檢討性謹厚未嘗以門第炫鄉里季子湜字正叔辛酉  
順天副榜以文學稱淳子均禧別有傳

○徐乾學字原一元文兄爲諸生慨然有用世志順治十  
七年舉京兆試明年以江南奏銷案呈誤除名越四年  
事白登康熙九年進士第第三人授編修十一年主順  
天試明年追論主試時少取副榜漢軍鑄秩歸十四年  
復原官明年陞右贊善母憂服闋充明史總裁官晉侍  
講歷侍講學士詹事內閣學士教習庶吉士禮部右侍



皇朝通志卷二十四  
三  
郎二十六年轉左釐正禮制科條定 皇太子出閣視  
學諸大典禮及北海祀典疏請停直省歲貢 廷試以  
免遠涉請改學臣半年解冊之例總俟歲科試畢彙報  
以除煩費請嚴禁京城居喪者毋得踰三月遽釋服及  
舉殯演戲以正風化故事天下鄉試卷解部科磨勘率  
科斂部費沿習已久乾學疏請禁止遂定例試卷到部  
限司官五日閱完呈堂覆閱移送禮科公閱具題亦以  
五日爲限自是陋習頓清朝鮮使者鄭載嵩訴其國王  
受枉罰鍰語頗謬妄乾學具疏糾劾

上見之喜曰此奏有關國體已而其王震恐伏罪先後奉  
命爲一統志明史鑒古輯覽古文淵鑒各館總裁尋  
充 經筵講官閩粵墟市向用古錢大吏入告請嚴究  
乾學言自昔皆古今錢兼行從民便也因考前代已行  
事爲議以獻

上深然之是秋九月陞都察院左都御史劾罷江西河南  
兩巡撫甘肅山東兩總兵官時軍政方行乾學上疏言  
軍政本以剔弊將帥借以營私造冊之提鎮託稱公費  
科斂偏裨偏裨責之小校扣其錢米芻豆窮卒吞聲無  
可控訴又或隱蔽逃亡冒銷餉廩文冊至京則挾賄請  
託希脫糾駁士卒之衣食已半入私橐半供賄賂矣請  
嚴加禁絕并治督撫以隱徇之罪 命下九卿議凡軍  
政計典非卓異入法概免註冊並停藩臬入覲天下便



之又請停武闈磨勘言武闈所重在技勇文固其所輕也臣第聞其派斂部費求免苛責不聞其有益國家又如武舉中額踰文闈兩倍名器倖濫於事體非宜

上皆嘉予允行在臺五月充戊辰會試總裁卽闈中轉刑部尙書甫就職會湖廣巡撫張汧以罪被逮詞連乾學旣得辨釋上疏乞歸

上不聽去令解部事仍領各館總裁明年子樹穀炯考選科道有名爲副都御史許三禮許奏乾學乃力求歸二十九年春

上命攜一統志宋元通鑑書局卽家編輯抵家數月總督傅臘塔疏論其家人居鄉不法又以濰縣令朱敦厚坐

罪當死乾學嘗以其父之馮死節封疆爲言至是牽連遂落職時借他事齟齬者不已是冬有旨飭大小諸臣毋得伐異黨同彼此傾軋事稍解三十三年秋

上以史館久未成書特召乾學及王鴻緒韓菼高士奇乾學弟秉義入京編輯命下而乾學已於前四日卒年六十四遺疏入復原官乾學幼穎悟絕人讀書一再過終身不忘後又得舅氏顧炎武指授根柢益深自爲翰林應奉文字無不稱旨爲學士凡制誥文章代言諸作皆出其手侍經筵諮詢所及如響應聲

嘗特賜御書博學明辨榜書初登第時經義旣廢復興士習骯髒不復識先民規範乾學與弟元文以復古



爲任主順天試苦心搜閱拔韓茨於遺卷中明年茨魁  
天下文體爲之一變居母憂時以近世喪葬禮闕不講  
輯讀禮通考一書詳備爲古所未有生平急友朋之難  
尤喜獎進人物海內負才之士輒羅致門墻揮斥金錢  
不少靳子五樹穀炯樹敏樹屏駿炯樹屏別有傳樹穀  
字藝初康熙乙丑進士授中書擢山東道御史時重逃  
人律黜遣相繼樹穀上疏力請得從寬減又疏請修  
三朝國史條陳便宜五事皆見施行俸滿外調歸樹敏  
字師魯康熙丁卯領鄉薦會乾學落職樹敏以嘉定令  
聞在上案牽及下獄事白登癸未進士授安陽令穿萬  
金渠表蕭烈婦修舉廢墜以驛站事罷歸駿字觀卿康

熙癸巳進士選庶吉士以詩語失檢坐罪死樹穀子德  
倬字伯厚山東登萊青道唐字仲質廣西全州牧德秩  
字敘九廣西梧州守德倬子傳軫傳箕傳星傳參傳星  
字雨若起家河南祥符丞歷遷汝州牧值黃河泛溢奉  
檄乘筏抵汴憲司令查賑災黎見有聚居村堡高阜水  
圍乏食者棹小舟載糧躬親賑給全活甚多終陳州知  
府傳參字省吾福建上杭縣駐防峯市縣丞有惠民  
愛之爲立碑頌德

○徐秉義字彥和乾學弟元文兄初名與儀補太倉諸生  
時郡城盛文社長洲宋實穎德宜彭瓏吳縣繆彤皆社  
中領袖雅推重秉義兄弟自是三徐之名聞遠近奏銷



黜籍例入太學改今名康熙十二年以進士第三人登第時乾學元文俱先以一甲登第至是海內豔稱爲科名盛事秉義授編修元文方由祭酒進掌院教習庶吉士以秉義在列疏辭

上特免秉義教習元文任院事如故十四年典試浙江事竣請養歸母喪服除補原官秋以史館纂修徵入授左中允充一統志總裁官明年陞侍講遷右庶子三十六年擢少詹充日講起居注三十八年進詹事備顧問與長洲韓茨同領代言之任充庚辰殿試讀卷官尋命總裁明史御試萬壽無疆賦第一賜御書擢秀清流匾陞額外禮部侍郎旋晉吏部右侍郎仍兼詹事

明年春試宋高宗論擢第二隨充律例館總裁奉命

與刑部侍郎綏色往勘山陝鹽商案事竣覆奏

上以讞擬失當詰責處分同寮謂

聖意怒綏專斷第據實奏辨可免秉義云與人同事而獨避其咎我不爲也部議落職

上稔知其誠謹命止解吏部侍郎任典壬午順天試明年奉命護送山東飢民回籍於每名額外捐貲量給錢米病則爲之調養飢民歡聲動地遷內閣學士兼禮部侍郎四十三年秋告歸明年春

上南巡過崑山幸乾學山園賜御書駐蹕崑山詩傳旨云詩中落照崑山掩玉色遠分秦望感人思二句



專爲爾兄弟而發又 賜御書恭謹老成匾 特署秉  
義爵里姓名於詩後又六年卒年七十九秉義通籍後  
半家居杜門卻埽購求古書或借稿本抄錄與碩儒餘  
姚黃宗義鄞縣萬斯同德清胡渭生桐城錢秉鐙諸人  
交每舉經史疑義相發明有得則疏錄成書念鼎革之  
際死事者多因廣搜紀載自崇禎二年以迄 國朝著  
忠烈紀實一書矜慎詳覈足稱信史最留心桑梓如世  
德倉廣孝阡育嬰堂同善會輒先任其事歷久不倦與  
人和易亮直卽忌其兄弟素修隙者亦稱道其長厚焉  
子樹閔字誠修幼補諸生入太學屢試不售入貲授四  
川屏山知縣遷雲南霑益知州雍正初調知陸涼改趙

州清文隱田豁免賠糧雪州民李文富寃獄擢景東府  
掌印同知捐俸創學使考棚遷開化知府咨部引 見  
卒於貴陽旅次樹閔次子德懷字邦錫考職授浙江麗  
水縣丞改安徽之貴池陞知靈璧捐貲辦災濬河又修  
葺城南新馬橋以濟衝途行旅民皆感悅移疾歸卒德  
懷子傳一字道魯捐授浙江慶元知縣歷黃巖東陽蕭  
山德清擢安徽廣德州直隸知州所至杜弊戢民能舉  
其職卒於官

○王喆生字醇叔明舉人志長孫父孚字甘谷工辭翰蚤  
世喆生弱冠以青浦籍補諸生時故明諸生朱用純以  
理學倡導後進喆生從受學沉潛反覆於四子五經大



學衍義資治通鑑諸書與同學數人嚴立課程互相稽考無間寒暑學以大進康熙十六年特行鄉試以例入監舉順天鄉試第一二十一年成進士選庶吉士授編修爲蔚州魏象樞睢州湯斌器重二十四年充會試同考官得孫勳以下八人皆知名士尋乞假養母歸顏其室曰依廬侍養二十餘年母歿益絕意仕進以造就後來爲事蒞生自得力用純之學置日記以自省察終身不輟又撰懿言日錄儀封張伯行稱其精深廣大比衛武公抑戒其教人必根柢經史探源性命而後及於文章事業家居五十年撫藩大吏及邑令或以政問必切實正告不干以私修學宮者再嘗偕司諭梁于淇步行

烈日中催集輸款人皆感奮葺工邑中魚鱗信冊久失田賦混淆二十六年蒞生致書巡撫趙士麟指陳利弊已允行而宵小吳文鑑故嘗於十九年清丈時舞弊灑派至是其黨阻撓之遂止三十六年巡撫宋學奉旨清丈蒞生上條議十八則允準施行旣而任事之員相繼遷去迫於郡限草率竣局蒞生引爲平生大恨事又以邑中漕糧民收民兌而丁強民弱需索爲累著漕規條議四則草漕糧呈稿請官收官兌與巡撫張伯行剴切言之卒如所請其他兩修試院設粥賑饑經理南鄉社倉修造名宦鄉賢祠請崇祀名宦鄉賢請興築隄岸兼濬田間河道於凡調卹鄉黨敦睦宗族之事靡不殫



竭心力以期有濟年八十一卒子景獻別有傳希正字友韓跂武字臥侯俱康熙癸巳舉人並有文行

○徐樹庸字去矜開任孫登康熙三十年進士授河南西華知縣減除徭役振興學校邑多竊盜廉其尤者置之法餘皆薄懲令自改境內以安行取赴部擢廣西永康知州永康故交趾地去京師萬里徭獍雜處男女無別長幼無序樹庸爲立學宮興教化三年治績大著內遷刑部員外郎轉郎中五十一年四月擢湖廣道監察御史典河南鄉試稱得士歷掌山東河南道在臺八年因事盡言以粵西土司橫暴請責成該管上司約束外任陞轉越次請赴部引見以昭畫一時保舉多私又請嚴

立賞罰俱奉 旨九卿確議著爲令最後赴 行在特

參私改摺奏事闕國本人咸爲樹庸危

聖祖語閣臣曰徐樹庸有膽宜內陞尋以正四品京堂需次假歸營葬事竣入都爲忌者所中罷歸卒年七十五子衡別有傳

○王荃字景芳父崧沒四十九日遺腹生荃家故貧稍長卽刻苦力學乾隆元年領 恩科鄉薦授內閣中書轉內閣侍讀尋遷刑部安徽司郎中獻議詳慎務得其平民婦陳氏其夫與人爭契券歸暴疾死旣殯疑死於毆控檢坐誣論死荃謂例載誤執傷痕不得與挾讎誣告者同罪民人王道友聞母夜呼救急握刀起逐賊旣知



爲其叔王五圖姦憤甚遂殺五論斬立決荃謂王五自  
絕於倫常不得以殺叔論並駁議上之得免死未幾擢  
福建道御史值歲歉奏陳積貯利弊請推常平之法於  
鄉社因社倉之規而行以常平條具甚悉又慮常平糶  
數多則買補難設買補未足米價正昂懸額不可派採  
又非是宜預籌變通之法因奏言一宜清查舊存溢額  
之可撥補者以杜隱蝕一宜將捐納貢監諸欸在本省  
收納本色存倉一本地捐穀除碾給兵米外餘宜通融  
撥補并欸以絕侵漁如此而額猶未充請將刑部贖罪  
各條準時價以穀易銀就本省完倉存貯所言皆切中  
事理既又奏三年計典宜責大吏杜奔競黜浮華以端

吏治之本語尤切直聞者忌之在臺二年章屢上後以  
劾奏福建巡撫阿思哈忤 旨降都察院經歷閱五年  
請假歸後阿思哈以事敗

上思荃言而荃已前卒年五十一荃少具至性見父遺書  
輒悲感流涕事母以孝聞喪偶獨處垂二十年不畜姬  
侍通籍後清操彌厲所至以勤職稱遇事敢爲無所瞻  
避旣歸足跡不入城市當道雖故舊未嘗一通名刺性  
喜讀書尤嗜朱子綱目馬氏通考以爲古來政治得失  
備於二書其他詩古文辭行草各書俱有古人法度

○李世望字蘭臺少爲名諸生與兄世樞埒乾隆辛巳  
覃恩貢入成均辛卯壬辰聯捷成進士授刑部主事充



提牢時捕繫山東亂民王倫餘黨又金川逆酋就俘圍  
固爲滿世望襍被直宿最著勤慎遷員外郎總辦秋審  
處引律比例無枉無縱擢雲南迤東道丁父憂服闋補  
湖南岳常澧道旋調鹽法長寶道楚南食鹽係水販赴  
漢口領運商人昂價居奇爲設法嚴禁隨時平減民皆  
稱便寶南局鑄錢多雜鉛鐵行使世望乃重懲任事胥  
吏夙弊頓清長沙所屬湘陰等縣瀕大江隄岸易衝激  
督率寮屬勤加修築田廬藉免水患奉檄往勘岳常諸  
郡水災觸暑親行泥淖中詳舉被災情形得賑卹如例  
先後三攝臬司篆多所昭雪與寧民何姓誣李姓謀殺  
其子株連纍纍世望反覆推鞠密遣幹員捕獲其子案

始定桂陽民女被惡少圖姦自戕陰賄女家寢其獄屢  
讞未決嚴訊得實論如律遷長蘆鹽運使是時商力日  
絀而習俗侈靡世望禁厨傳卻餽遺性素淡泊至是益  
躬行節儉以倡導之風俗爲之一變以疾乞歸又十二  
年卒年七十八世望律身嚴整在成均日相國尹繼善  
延主家塾師範卓然深器重之自以浮沉諸生久宦轍  
所至喜獎飾士類丁酉分校京兆試識拔皆知名士歸  
田後未嘗以勢分炫鄉里造謁者雖後進子弟不衣冠  
不相見春秋佳日時招邀諸故人談讌流連以相娛樂  
於諸兄弟從子友恭恩義尤無間存歿云子以健字健  
行辛丑進士授山西汾陽知縣調鳳臺興利懲奸培養



士氣晉秩刑部主事進員外郎終養歸承遺命捐重貲修葺邑中文廟殿廡堂齋俱煥然復其舊觀復偕同志創行灑掃事例爲整飭久遠計當事嘉之欲聞諸朝力辭而止尋病卒年六十一

○汪爲善字保乾一字心揆號叶淵先世自歙遷吳祖癸正助修崑邑文廟隸籍崑山爲善幼穎異年十七縣府院試均第一乾隆庚辰由廩貢生舉順天鄉試辛巳成進士選翰林院庶吉士未散館卒年三十二生有至性家庭雍睦無間言尤喜周濟貧乏遺命捐建義莊贍族著有春秋述義八卷青浦王昶序蘭芬室詩鈔四卷同年生陽湖趙翼序詩餘一卷采入國朝詞綜

○李清鳳字翔千號古廉父鏞新陽廩生能文章妻外獨居終身後母生諸弟有不馴者勸教周至節縮館穀代清其逋負清鳳中道光十二年舉人主試者蕭山湯文端公疑其文爲方氏未刻稿房官廖鴻苞力任之以房魁薦抑置八十三名旋丁父艱十六年中進士入二甲以主事分刑部二十三年丁承重艱歸主太倉婁東松江景賢書院文行兼勗士習蒸蒸嚮風二十五年服闋赴部精於聽斷多平反有文選司某失察部辦得賄事偕滿洲司員恩錫定讞堂官疑情縱盛怒幾成大獄一再覆審猥非知情獄卒昭雪在秋審處數載胥吏奉公惟謹咸豐元年四月補陝西司主事七月遷雲南司員



外郎二年二月京察記名以道府用旋升河南司郎中  
三年四月時粵逆自江甯西竄河南入畿輔京城設巡  
防局稽察奸宄以清鳳爲審案司員先是巡兵得形迹  
可疑者輒殺勿問清鳳請於諸王大臣被脅逃回殺人  
者砍傷人及未傷人以次定罪由是無枉濫者四年遷  
內閣侍讀學士十月遷大理寺少卿十二月遷通政司  
五年五月遷左副都御史六月署刑部左侍郎六年正  
月奉命督順天學政八月實授刑部右侍郎視學如  
故清鳳遇士巖而有恩喜獎掖寒峻崑新向無會館清  
鳳倡爲之計偕者入都咸得投止處旣貴常以祿不逮  
養爲恨繪承思圖致風木之感訂年譜於父庭訓寢疾

狀言之綦詳起居儉陋有寒素不能堪者旋以風疾乞  
歸

文宗時一歲三遷由郎署蹶躋卿貳自傷無能報稱咸豐  
九年卒於家年五十有九事詳國史列傳

○李德儀字吉羽號筱輪中城兵馬司副揮增厚子幼穎  
慧過人家中落讀書邑之千墩鎮鎮離城三十里數日  
必歸視親徒步往來寒暑無間旣游庠隨侍都中肄業  
成均每課輒前列名鵲起增厚望誤戍塞上德儀旅居  
益發憤中道光癸卯南元覆試一第一名甲辰考取國  
子監學正學錄記名補用丁未成進士入翰林增厚戍  
歸旋卒哀毀骨立旣服闋咸豐壬子散館館元授編修



充 國史館協修 實錄館纂修 聖訓總校乙卯充  
 實錄館提調丙辰教習庶吉士 實錄慶成進侍講  
 上書房行走照料恭親王讀書同愷王恭王校勘唐  
 詩鼓吹充 日講起居注官戊午京察記名以道府用  
 旋進侍講學士轉侍讀學士簡授四川正考官旋授四  
 川學政首以端士習正文體為訓選刻唐律賦以為程  
 式裁簡棚規至今守之自以受 兩朝厚恩雖為學臣  
 而於地方諸事知無不言粵賊擾及川南與諸大吏講  
 戰守策密函投機宜扼賊使不得逞奏某督之不任職  
 者去之積勞致病庚申正月卒於邛州年四十三所著  
 有 御試翰詹題名學政題名順天同考題名續貢舉

考略韻學異同辨要早朝酬唱使蜀記程蜀輶吟艸德  
 儀精於選理其散館乾清宮賦及成均課馮牙文世傳  
 誦之







